

**MESYUARAT KEDUA, PENGGAL PERTAMA  
PARLIMEN KEEMPAT BELAS**

**2018**

**HARI RABU : 28 NOVEMBER 2018**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB .TUAN SU KEONG SIONG  
[ KAMPAR ]**

**TARIKH : 28 NOVEMBER 2018**

**SOALAN NO. 1**

minta **MENTERI PEMBANGUNAN USAHAWAN** menyatakan jumlah peruntukan yang telah disalurkan di bawah skim Tabung Ekonomi Kumpulan Usaha Niaga (TEKUN Nasional) untuk tempoh tahun 2013 hingga 2018. Sejauh mana keberkesanan pelaksanaan skim TEKUN membantu usahawan, khususnya di luar bandar. Apakah kaedah-kaedah dan badan yang dipertanggungjawabkan bagi memantau perlaksanaan skim ini.

**JAWAPAN**

Tuan Yang Dipertua,

TEKUN Nasional merupakan agensi di bawah Kementerian Pembangunan Usahawan (MED) dengan matlamat penubuhan untuk menyediakan kemudahan pembiayaan secara mudah kepada usahawan kecil. Pembiayaan yang ditawarkan adalah di antara RM1,000 sehingga RM100,000 dalam tempoh pembiayaan dari enam (6) bulan sehingga 10 tahun. Sektor utama perniagaan yang dibiayai adalah perkhidmatan, pembuatan, peruncitan, serta kontraktor kecil.

Bagi tempoh 2013 hingga 2018, pihak Kerajaan telah menyediakan peruntukan sebanyak RM1.5 bilion kepada TEKUN Nasional untuk disalurkan kepada usahawan. Berdasarkan jumlah tersebut dan tambahan dana dalaman TEKUN Nasional RM1.27 bilion, sebanyak RM2.77 bilion disalurkan kepada 175,445 usahawan sebagai pembiayaan untuk perniagaan dengan pecahan seperti berikut :

<b>Tahun</b>	<b>Pinjaman (RM)</b>	<b>Bilangan Usahawan (orang)</b>
2013	535,536,500	41,679
2014	349,147,750	25,163
2015	582,404,832	32,883
2016	703,374,500	42,141
2017	382,545,584	21,752
Julai 2018	219,890,500	11,827
<b>JUMLAH</b>	<b>2,772,899,666</b>	<b>175,445</b>

## **NO. SOALAN :1**

Pelaksanaan dan pemantauan skim TEKUN ini dilaksanakan melalui 198 pejabat cawangan TEKUN di seluruh negara. Antara kaedah pemantauan yang dilaksanakan adalah seperti berikut :

- i. Lawatan ke premis peminjam;
- ii. Melaksanakan penjadualan semula bayaran kepada usahawan yang berkelayakan; dan
- iii. Mewujudkan Pusat Panggilan Kutipan (*Collection Call Center*).

Bagi keberkesanan pelaksanaan dan pemantauan skim TEKUN, RM2.07 bilion telah berjaya dibayar balik oleh peminjam dari tahun 2014 sehingga Julai 2018. Selain itu, jumlah bayaran balik juga telah menunjukkan peningkatan pada setiap tahun seperti di perincian berikut :

<b>Tahun</b>	<b>Bayaran Balik Pinjaman (RM)</b>
2014	312,420,019.46
2015	355,890,883.88
2016	543,768,233.76
2017	554,869,469.52
2018 (sehingga Julai)	302,700,470.40
<b>JUMLAH</b>	<b>2,069,649,077.02</b>

Kadar *Nonperforming Financing* (NPF) sehingga September 2018 adalah 42.88% atau RM531.27 juta. Langkah kutipan semula sedang dipergiatkan oleh Kementerian dan TEKUN Nasional.

Seramai 417,000 peminjam telah mendapat manfaat daripada jumlah tersebut. Sejumlah 101,000 peminjam berjaya direkodkan melalui peningkatan jualan, peningkatan bilangan pekerja dan peningkatan keuntungan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

**PERTANYAAN : LISAN**  
**DARIPADA : YB DATUK HAJI SHABUDIN BIN YAHAJA**  
**[ TASEK GELUGOR ]**

**TARIKH : 28 NOVEMBER 2018**

**SOALAN**

Minta **MENTERI PELANCONGAN, SENI DAN BUDAYA** menyatakan adakah terdapat sebarang usaha sama di antara pihak Muzium Negara dan muzium negara luar bagi menjadikan pameran di Muzium Negara lebih menarik dan interaktif.

**JAWAPAN :**

Tuan Yang di-Pertua,

Jabatan Muzium Malaysia (JMM) dari semasa ke semasa sentiasa meningkatkan daya tarikan pameran di Muzium Negara dengan penggunaan teknologi terkini seperti *Kiosk Touch Screen, Interactive Audio, Interactive Projector, Digital Graphic, Hologram, Pepper's Ghost dan Magnified Glass Showcases*. JMM juga menjalankan kerjasama dengan muzium-muzium dari luar negara dengan mengadakan pameran-pameran di Muzium Negara seperti berikut:

1. Pameran Kebudayaan Dongson: Khazanah Purba dengan kerjasama *National Museum of History*, Vietnam dari 4 Mac hingga 4 Mei 2014;

## NO. SOALAN : 2

2. Pameran Khazanah Dari Istana Musim Panas (*Treasures From The Summer Palace*) dengan kerjasama *Summer Palace Museum*, Republik Rakyat China dari 15 Disember 2014 hingga 3 Mac 2015;
3. Pameran Porselin Biru dan Putih pada Akhir Dinasti Yuan dan Awal Dinasti Ming dengan kerjasama *China Association Culture Inspiration*, Republik Rakyat China dari 22 November hingga 26 Disember 2015;
4. Pameran Istana *Czech/ Czech Castle* dengan kerjasama *National Museum of Czech Republic* dari 29 Februari hingga 31 Mac 2016; dan
5. Pameran *Peking Man* di Malaysia dengan kerjasama Muzium Zhoukoudian *Heritage Site*, Republik Rakyat China dari 29 Mac hingga 6 Jun 2018.

Pada tahun 2016, JMM telah mengadakan Pameran bertaraf antarabangsa di Muzium Negara iaitu Tenunan Songket Asean ‘Ratu Kain: Satu Rumpun, Satu Warisan’ dengan kerjasama daripada *Museum of Ethnic Cultures of Vietnam*, *Artisan Angkor* (Kemboja), *Northern Thai Weaving Training Centre*, Chiang Mai, Thailand dan *Museum Nasional Indonesia*. Melalui kerjasama ini, JMM telah berjaya mendapat pinjaman koleksi dari negara Vietnam, Kemboja, Thailand dan Indonesia. Pameran ini telah mendapat sambutan yang sangat menggalakkan dengan kehadiran seramai 159,530 pengunjung.

JMM juga sering mendapat permohonan dari muzium-muzium dari luar negara untuk menjalankan kerjasama mengadakan pameran di Muzium Negara. Terkini, JMM dalam perancangan untuk mengadakan dua (2) pameran pada tahun 2019 iaitu Pameran *Heritage of the Great Steppe: Masterpieces of Jewellery Art* dengan kerjasama Muzium Nasional Kazakhstan dan Pameran *Malaysia-China Relations: From Ancient Time to The Future* dengan kerjasama Muzium Nasional Republik Rakyat China.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK  
[BENTONG]**

**TARIKH : 28 NOVEMBER 2018 [ RABU ]**

**SOALAN NO. 3**

Minta **MENTERI PERUMAHAN DAN KERAJAAN TEMPATAN** menyatakan **rasional untuk membina sekurang-kurangnya sebuah loji pelupusan sampah** di setiap negeri. **Adakah Program 3R tidak berkesan** sehingga akan mengakibatkan kesemua tapak pelupusan sampah tidak dapat menampung sampah yang akan dijanakan. **Adakah 'public consultation' akan diadakan sebelum keputusan dibuat.**

**JAWAPAN**

Yang di-Pertua,

1. Untuk makluman Yang Berhormat, pembinaan loji pelupusan sampah di setiap negeri adalah bertujuan untuk menangani masalah kekurangan tanah bagi pelupusan sisa pepejal. Pemilihan lokasi bagi pembinaan loji pelupusan sampah perlu mengambil kira kapasiti dan ciri-ciri sisa pepejal (*waste characteristic*) di sesuatu kawasan serta jarak kawasan kutipan sisa pepejal ke loji supaya pengurusan sisa pepejal di setiap kawasan dapat dilaksanakan

secara berkesan. Selain itu, pembinaan loji ini dapat mengurangkan impak negatif terhadap alam sekitar seperti kebakaran, bau, limpahan *leachate* dan sebagainya.

2. Sebelum sesebuah fasiliti pengurusan sisa pepejal dibina, kajian penilaian kesan kepada alam sekitar terperinci (*Detailed Environmental Impact Assessment - DEIA*) perlu dilaksanakan bagi menilai keseluruhan impak terhadap alam sekitar. Salah satu komponen kajian DEIA adalah mengadakan sesi libat urus awam (*public engagement*) yang mana penerangan berkaitan projek yang akan dibangunkan dimaklumkan kepada penduduk setempat.
3. Untuk makluman Yang Berhormat, program *reduce, reuse and recycle* (3R) yang dilaksanakan oleh KPKT telah membantu dalam mengurangkan sisa pepejal yang dihantar ke tapak pelupusan sekali gus memanjangkan jangka hayat tapak pelupusan. Pelaksanaan program ini merupakan faktor yang menyumbang kepada peningkatan Kadar Kitar Semula Kebangsaan dengan pencapaian sebanyak 17.5% pada tahun 2016, 21% pada tahun 2017 dan meningkat kepada 24.6% pada tahun 2018. Pencapaian ini disasarkan akan terus meningkat kepada 30% menjelang tahun 2020. Rasionalnya, peningkatan kadar kitar semula ini memberi impak yang besar kepada perancangan pembinaan fasiliti pengurusan sisa pepejal termasuk tapak pelupusan memandangkan kuantiti sisa pepejal dapat dikurangkan sebelum dilupuskan di tapak pelupusan.
4. Untuk makluman Yang Berhormat juga, secara dasarnya, pelaksanaan program 3R ini telah memberi impak yang positif ke atas alam sekitar dan menyumbang kepada pengurangan sisa pepejal yang dihantar ke tapak pelupusan. Kejayaan program kitar semula juga dapat dibuktikan menerusi pencapaian Kadar Kitar Semula Kebangsaan seperti yang dinyatakan sebelum ini.

Pencapaian tersebut disumbang oleh program-program kesedaran 3R yang dilaksanakan secara komprehensif dan berterusan meliputi pelbagai golongan sasaran di peringkat tadika, sekolah, institusi pengajian tinggi, komuniti dan industri.

5. Kementerian turut memberi tumpuan kepada aspek pendidikan melalui pembangunan Modul Latihan Kelab Kitar Semula Sekolah Rendah dan Menengah bermula tahun 2013 (telah dikemas kini edisi 2018) oleh pihak Perbadanan Pengurusan Sisa Pepejal dan Pembersihan Awam (SWCorp). Selain itu, Modul Pengajaran dan Pembelajaran Pengurusan Sisa Pepejal dan Amalan 3R di peringkat prasekolah turut diperkenalkan di samping pelaksanaan Pertandingan Kitar Semula Sekolah-sekolah Peringkat Kebangsaan (PerKISS) untuk menggalakkan amalan mengguna dan mengitar semula. Hari Kitar Semula Kebangsaan juga turut dilaksanakan setiap tahun dengan pengisian pelbagai aktiviti yang memberi pendedahan dan kesedaran kepada masyarakat mengenai penjagaan alam sekitar.
6. Usaha-usaha yang telah dilaksanakan secara berterusan bagi menggalakkan penyertaan dan meningkatkan kesedaran masyarakat terhadap penjagaan alam sekitar melalui pembudayaan amalan 3R.

**PEMBERITAHUAN PERTANYAAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS (2018)**  
**DEWAN RAKYAT**

**PERTANYAAN :** LISAN

**DARIPADA :** YB DATO' SRI ISMAIL SABRI BIN YAAKOB  
[ BERA ]

**TARIKH :** 28 NOVEMBER 2018 ( RABU )

**SOALAN:**

**Dato' Sri Ismail Sabri bin Yaakob [ Bera ]** minta **PERDANA MENTERI** menyatakan adakah Kerajaan akan meneruskan dasar membangunkan pusat tahliz dengan menambahbaik pusat tahliz, serta memberikan latihan kepada pelajar-pelajar tahliz bagi menjamin masa depan mereka yang lebih cerah.

**JAWAPAN : (YB HAJJAH FUZIAH SALLEH, TIMBALAN MENTERI  
DI JABATAN PERDANA MENTERI)**

Tuan Yang di-Pertua,

Kerajaan sentiasa komited memberi komitmen penuh dalam usaha menambahbaik institusi tafhib serta memberikan latihan yang sesuai selaras dengan pengubalan Dasar Pendidikan Tafhib Negara (DPTN) yang memberikan penekanan kepada teras-teras beikut :

- i. memantapkan undang-undang dan penguatkuasaan;
- ii. memperkenalkan model institusi tafhib yang diiktiraf;
- iii. memantapkan kurikulum pendidikan tafhib yang sesuai dengan pendidikan arus perdana;
- iv. memperkasa tadbir urus institusi tafhib;
- v. mewujudkan sistem pengiktirafan dan pensijilan bagi institusi tafhib.

Selain itu, dalam usaha memperkasakan kurikulum tafhib, kerajaan memperkenalkan 3 model iaitu model Kurikulum Bersepadu Tafhib (KBT), tafhib turath, dan tafhib kemahiran. Dari segi peningkatan kemahiran tenaga pengajar kerajaan melalui JAKIM dari semasa ke semasa menganjurkan bengkel dan kursus dengan kerjasama Kementerian Pendidikan Malaysia (KPM) .

Kerajaan juga bercadang untuk mewujudkan Majlis Tafhib Negara pada tahun depan di dalam usaha menyelaras sekolah-sekolah tafhib swasta.

Undang-undang juga sedang dipinda untuk memasukkan definisi sekolah tafhib sebagai sebagai sekolah agama.

Untuk menjamin keselamatan di institusi tafhib, JAKIM dengan kerjasama Institut Keselamatan dan Kesihatan Pekerjaan melaksanakan Kursus Keselamatan dan Kesihatan kepada sekolah tafhib di seluruh negara. Kursus ini memberi penekanan kepada aspek kesihatan dan keselamatan kepada warga institusi tafhib.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN TAN KOK WAI [CHERAS]**

**TARIKH : 28 NOVEMBER 2018 (RABU)**

**SOALAN : 5**

**TUAN TAN KOK WAI [CHERAS]** minta **MENTERI KOMUNIKASI DAN MULTIMEDIA** menyatakan bagaimana kebebasan media dijamin begitu juga memastikan media mempunyai kebebasan untuk ‘semak dan timbang’ pentadbiran Kerajaan.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) sedia maklum dan mengetahui bahawa media memainkan peranan penting dalam sesebuah negara yang mengamalkan sistem pemerintahan demokrasi. Media juga berperanan sebagai pemantau terhadap institusi-institusi kerajaan daripada berlakunya penyalahgunaan kuasa dan penyelewengan serta menggalakkan tadbir urus yang telus dan bertanggungjawab.
2. Peranan media adalah penting serta menjadi jambatan penghubung di antara kerajaan dan rakyat yang dapat digunakan sebagai medium untuk memberi maklumat yang tepat dan sahih sekaligus mendidik masyarakat berkenaan polisi-polisi kerajaan. Kini melalui media sosial, rakyat boleh memberi respon segera berkenaan polisi-polisi kerajaan tersebut.

## **SOALAN : 5**

3. KKMM juga amat menyedari bahwasanya media sememangnya memerlukan maklumat mengenai ekonomi, keselamatan negara dan isu-isu yang memberi kesan langsung kepada rakyat untuk disampaikan secara cepat dan pantas. Media sosial membolehkan agensi media menyampai dan mendapatkan maklum balas daripada orang awam dan pemegang amanah terhadap penerimaan dasar, program dan perkhidmatan agensi kerajaan. Media sosial menyediakan kaedah pengurusan kandungan yang mudah. Pengamal media boleh memuat naik maklumat dalam pelbagai format seperti video, audio, gambar dan dokumen. Menerusi media sosial ini, pengamal media dapat memberi penjelasan dan gambaran sebenar terhadap isu-isu dan berita terus kepada rakyat.
4. Walau bagaimanapun kebebasan media bukan tanpa had tetapi tertakluk kepada undang-undang sedia ada seperti Kanun Keseksaan dan Akta Komunikasi dan Multimedia. KKMM melalui Suruhanjaya Komunikasi dan Multimedia (SKMM) sentiasa memantau laporan-laporan media untuk memastikan bahawa ia digunakan dengan penuh tanggungjawab bagi memelihara ketenteraman dan kesejahteraan rakyat Malaysia yang berbilang kaum dan agama.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN KHOO POAY TIONG [ KOTA MELAKA ]**

**TARIKH : 28 NOVEMBER 2018 (RABU)**

**SOALAN : 7**

**PR-1412-L02235**

Tuan Khoo Poay Tiong [ Kota Melaka ] minta **MENTERI KOMUNIKASI DAN MULTIMEDIA** menyatakan apakah statistik dan kesan daripada pelaksanaan Mandatory Standard on Access Pricing (MSAP) terhadap harga internet jalur lebar (broadband), dan apakah rancangan-rancangan lain Kerajaan di bawah inisiatif 'Double the Speed and Half the Price'.

**JAWAPAN**

Tuan Yang di-Pertua,

Saya pohon keizinan untuk menjawab pertanyaan ini bersekali dengan pertanyaan daripada **YB Dato' Sivarraajh Chandran pada 28 November 2018** kerana menyentuh isu yang sama berkaitan perkhidmatan internet/ jalur lebar.

1. Untuk makluman Ahli Yang Berhormat, Standard Mandatori mengenai Harga Capaian (“*Mandatory Standard on Access Pricing atau MSAP*”) adalah mekanisma yang membolehkan pemberi perkhidmatan memperoleh harga borong yang lebih rendah. Dengan harga yang lebih rendah, mereka boleh menawarkan pakej runcit baharu kepada pengguna pada harga mampu milik yang lebih berdaya saing (*competitive*).
2. Kementerian telah mengumumkan Inisiatif jalur lebar dua kali lebih pantas pada separuh harga atau “*Double the speed, half the price*”. Untuk menjayakan inisiatif ini, Suruhanjaya Komunikasi dan Multimedia Malaysia (SKMM) telah mengeluarkan MSAP yang berkuatkuasa mulai 1 Januari 2018. MSAP dilaksanakan pada 8 Jun 2018, perjanjian telah dicapai di antara telco-telco berkenaan harga borong setelah rundingan diadakan di antara mereka.
3. Ekoran itu, adalah dijangkakan bahawa harga jalur lebar akan dikurangkan sebanyak 25% menjelang 31 Disember 2018. Ini merupakan langkah awal Kerajaan bagi menjayakan “*Double The Speed, Half The Price*” yang telah diumumkan. Rasionalnya, rakyat bakal menikmati kemudahan capaian yang lebih baik, kos yang lebih mampu milik dan meningkatkan peluang akses yang memberi pulangan terbaik dalam pelbagai situasi.
4. Kerangka MSAP ini menawarkan pakej borong pada harga yang lebih rendah kepada syarikat telekomunikasi. Kementerian melalui Suruhanjaya Komunikasi dan Multimedia Malaysia (SKMM) juga

## **SOALAN NO: 7**

sedang mengkaji langkah-langkah lain bagi menurunkan harga jalur lebar dan memantau supaya harga pakej permulaan adalah munasabah untuk semua rakyat.

5. Lanjutan daripada pelaksanaan MSAP, syarikat-syarikat pembekal perkhidmatan telekomunikasi telah menyahut saranan Kerajaan dengan menawarkan pakej-pakej jalur lebar talian tetap yang baharu dengan harga yang lebih berpatutan dengan kadar kelajuan yang lebih tinggi.
6. Syarikat-syarikat telekomunikasi yang utama telah mengumumkan pengurangan harga yang melebihi 30%. Kini pakej permulaan berkelajuan 30Mbps boleh dinikmati oleh rakyat pada harga serendah RM79, selain pakej permulaan lain di bawah RM100. Antara syarikat telekomunikasi yang telah mengumumkan pakej-pakej jalur lebar talian tetap yang baharu adalah seperti Telekom Malaysia (TM), Maxis, TIME dotcom (TIME) dan Celcom.

### **SENARAI PERTANYAAN UNTUK DIJAWAB BERSEKALI PADA 28 NOVEMBER 2017 (RABU)**

TARIKH	NO. GILIRAN	SENARAI PERTANYAAN
<b>28 NOVEMBER 2018 (RABU)</b>	<b>27</b>	PR-1412-L02747 <b>Dato' Sivarraajh Chandran [ Cameron Highlands ]</b> minta <b>MENTERI KOMUNIKASI DAN MULTIMEDIA</b> menyatakan apakah status mewujudkan sistem jalur lebar " <i>double the speed, half the price</i> " untuk kelajuan internet, adakah rakyat Malaysia dapat menggunakan pelan internet yang murah dengan kelajuan yang tinggi dalam masa yang terdekat.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HENRY SUM AGONG [ LAWAS ]**

**TARIKH : 28 NOVEMBER 2018 (RABU)**

**SOALAN NO. 8**

Minta **MENTERI PENDIDIKAN** menyatakan langkah segera Kementerian untuk membangun semula sekolah-sekolah yang dalam keadaan daif dan kritikal termasuk menaik taraf bangunan yang masih boleh digunakan sekarang di kawasan Parlimen Lawas.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah melaksanakan program khusus di bawah peruntukan *Private Finance Initiative* (PFI) dan juga pembangunan (DE) untuk membangun serta menaik taraf sekolah yang berada dalam keadaan daif. Program ini sentiasa ditambah baik dari aspek skop dan pelaksanaannya termasuk bagi negeri Sarawak dan Parlimen Lawas secara khususnya. Pada tahun 2018, terdapat sembilan (9) projek pembangunan semula sekolah daif secara *Industrial Building System* (IBS) yang dilaksanakan di Parlimen Lawas. Empat (4) daripadanya telah siap dan lima (5) projek lagi sedang dalam pelaksanaan.

Strategi terkini KPM berkaitan pelaksanaan naik taraf sekolah daif ini, skala berdasarkan analisis skor yang telah diperkenalkan oleh KPM buat kali pertamanya, yang mana skor ini telah mendapat perakuan daripada pihak teknikal. Bagi tahun 2019, pelaksanaan naik taraf sekolah daif sedang diperhalusi berdasarkan skala yang julung-julung kalinya diperkenalkan di Malaysia ini.

## **SOALAN NO: 8**

Selain itu, dalam *Rolling Plan* ke-4, Rancangan Malaysia Kesebelas (RMKe-11) Tahun 2019 agensi pusat juga telah meluluskan empat projek dalam Parlimen Lawas yang melibatkan pembinaan bilik darjah serta pelbagai kemudahan berkaitan dan rumah guru dengan kos projek berjumlah RM47.85 juta.

Bagi memastikan pembangunan sekolah-sekolah daif ini dilaksanakan mengikut jadual, pemantauan lebih rapi telah dilaksanakan yang mana KPM sendiri dipantau oleh Unit Penyelaras Pelaksanaan (ICU) secara berkala iaitu setiap dua minggu sekali. Ini demi memastikan tidak ada lagi projek sakit ataupun ketirisan atau projek yang tidak siap-siap demi kemaslahatan rakyat Malaysia dan demi kemaslahatan anak-anak sekolah.

Untuk makluman Ahli Yang Berhormat, melalui *dashboard* yang diletakkan di pejabat saya sendiri, saya secara peribadi boleh memantau pelaksanaan sekolah daif ini secara harian dan saya akan memastikan semua Pejabat Pendidikan Daerah (PPD) dan Jabatan Pendidikan Negeri (JPN) memantau pelaksanaan projek sekolah daif juga secara harian seperti mana yang saya lakukan. Saya mencadangkan Ahli-ahli Yang Berhormat juga boleh memainkan peranan untuk membantu KPM memantau kemajuan projek-projek KPM dengan cara yang bersesuaian di kawasan masing-masing. KPM akan sentiasa mendengar setiap laporan yang dikemukakan oleh Ahli-ahli Yang Berhormat. Ini dapat memastikan segala projek penaiktarafan sekolah daif tidak akan tergendala dan tidak akan menjadi seperti kerajaan sebelum ini.

Sekian, terima kasih.

RJM122

**NO. SOALAN 9**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : PUAN HAJAH NATRAH BINTI ISMAIL**  
**[ SEKIJANG ]**

**TARIKH : 28 NOVEMBER 2018**

**SOALAN : 9**

**PUAN HAJAH NATRAH BINTI ISMAIL** minta **PERDANA MENTERI** menyatakan apakah langkah yang akan diambil oleh Kementerian dalam mengatasi isu bangunan terbiar dan kuarters Kerajaan yang tidak lagi didiami di seluruh negara.

**JAWAPAN : YB TUAN MOHAMED HANIPA BIN MAIDIN**  
**TIMBALAN MENTERI**  
**DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Bahagian Pengurusan Hartanah (BPH), Jabatan Perdana Menteri telah diberi tanggungjawab untuk menguruskan sebanyak 38 Bangunan Gunasama Kerajaan Persekutuan (BGKP) di semenanjung Malaysia dan sejumlah 27,431 unit kquarters (Rumah Biasa Kerajaan) di 5 lokasi seluruh negara, iaitu di Putrajaya, Kuala Lumpur, KLIA, Tanjung Kupang dan Labuan.

Semua urusan berkaitan seperti penyenggaraan dan pengisian dilaksanakan mengikut peraturan dan kontrak yang telah disediakan. Pada masa ini, tiada BGKP dan kquarters di bawah kawalan BPH yang terbiar dan tidak lagi didiami. Terdapat sebilangan kquarters ketika ini yang kosong dan sedang dalam proses pembaikan sebelum ditawarkan untuk diduduki kepada pemohon yang layak.

Sekian, terima kasih.

**SOALAN NO: 10**

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

PERTANYAAN : LISAN

DARIPADA : YB DATO' HAJI CHE ABDULLAH BIN MAT NAWI

TARIKH : 28 NOVEMBER 2018

SOALAN :

**Dato' Haji Che Abdullah bin Mat Nawi [ Tumpat ]** minta **MENTERI TENAGA MANUSIA** menyatakan statistik tuntutan pencen ilat PERKESO sepanjang 2012-2017 serta kaedah penilaian yang digunakan bagi permohonan tuntutan tersebut.

PR-1412-L02324

## **JAWAPAN**

Tuan Yang Di Pertua,

- Untuk makluman Dewan Yang Mulia, pada tahun 2017 terdapat sebanyak 10,224 penerima baru Pencen Ilat atau Bantuan Ilat berbanding 8,714 penerima pada 2016. Jumlah terkumpul bilangan penerima Pencen Ilat dan Bantuan Ilat sehingga tahun 2017 adalah seramai 63,822 penerima. Jumlah ini menunjukkan peningkatan sebanyak 9.22% atau 5,386 penerima berbanding 58,436 orang pada tahun sebelumnya. Statistik bilangan kes permohonan yang dilaporkan kepada PERKESO dan diluluskan bayaran dari tahun 2012 hingga 2017 adalah seperti di **Jadual 1**.

**JADUAL 1: BILANGAN KES PENCEN ILAT DAN BANTUAN ILAT DILAPOR DAN DILULUSKAN BAYARAN 2012 – 2017**

Tahun	Bilangan Kes Dilaporkan	Bilangan Kes Diluluskan Bayaran	Bil Penerima Terkumpul
2012	13,615	5,372	42,523
2013	17,552	6,890	46,387
2014	18,072	7,000	49,959
2015	19,649	7,830	53,990
2016	23,502	8,714	58,436
2017	28,853	10,224	63,822

*Sumber : Cawangan Aktuari dan Statistik, Pertubuhan Keselamatan Sosial*

Tuan Yang Di Pertua,

2. Untuk makluman Dewan Yang Mulia, salah satu syarat bagi mendapatkan Pencen Ilat atau Bantuan Ilat ialah Orang Berinsurans perlu disahkan mengidap keilatan oleh Jemaah Doktor atau Jemaah Doktor Rayuan selain daripada syarat kelayakan caruman dan faktor umur. Orang Berinsurans dianggap sebagai mengidap keilatan apabila mengalami suatu keuzuran yang berkekalan sama ada tidak boleh diubati atau tidak mungkin sembuh serta tidak berupaya mencari nafkah dengan kerja yang berpadanan dengan kekuatan dan tenaganya, sekurang-kurangnya satu pertiga (1/3) daripada keupayaan pekerja yang normal.
3. Bagi tuntutan Pencen Ilat, PERKESO akan merujuk permohonan Orang Berinsurans ke Jemaah Doktor untuk disahkan keilatan. Sekiranya Orang Berinsurans atau PERKESO tidak berpuas hati dengan keputusan Jemaah Doktor, kedua-dua pihak boleh merayu kepada Jemaah Doktor Rayuan. Sidang Jemaah Doktor / Jemaah Doktor Rayuan adalah sidang yang dianggotai oleh doktor dan doktor pakar daripada hospital kerajaan dan merupakan badan bebas.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KARUPAIYA A/L MUTUSAMI  
[PADANG SERAI]**

**TARIKH : 28 NOVEMBER 2018 (RABU)**

**SOALAN NO. 11**

Minta **MENTERI PENDIDIKAN** menyatakan apakah langkah-langkah yang diambil oleh Kementerian untuk meningkatkan kualiti guru-guru yang mengajar di sekolah-sekolah Tamil agar dapat melahirkan pelajar Tamil yang cemerlang disamping menggalakkan kaum lain belajar bahasa Tamil di sekolah Tamil.

**JAWAPAN**

Yang di-Pertua,

Kementerian Pendidikan Malaysia (KPM) sentiasa memastikan guru yang berkualiti akan terus berkualiti melalui beberapa inisiatif yang dijana berdasarkan Pelan Pembangunan Pendidikan Malaysia (2013-2025). Bagi memastikan kualiti guru termasuk guru-guru sekolah Jenis kebangsaan Tamil (SJKT) terus ditingkatkan seiring dengan perkembangan semasa, KPM mengambil langkah-langkah berikut, antaranya:

1. Mengadakan pelbagai latihan dan program secara berterusan kepada guru di semua sekolah bagi memastikan pedagogi, kemahiran dan kompetensi mereka berada pada tahap yang tinggi.
2. Latihan pengetahuan dan kemahiran guru dalam pengajaran dan pembelajaran (PdP) abad ke-21 yang menekankan kepada pendidikan STEM, Kemahiran Berfikir Aras Tinggi (KBAT), *Professional Learning Community* (PLC), dan kemahiran ICT.
3. Mengadakan jaringan kolaboratif dengan Kerajaan Tamil Nadu, India bagi meningkatkan pengetahuan dan perkongsian PdP Bahasa Tamil dan Kesusasteraan Tamil dalam kalangan guru-guru di SJKT.
4. Di peringkat Program Ijazah Sarjana Muda Perguruan (PISMP), KPM menawarkan pengkhususan bidang Bahasa Tamil Sekolah Rendah di Institut Pendidikan Guru bagi melatih guru dalam kesusasteraan Bahasa Tamil, kaedah pengajaran dan pembelajaran bahasa Tamil.
5. PISMP bagi pengkhususan bidang Bahasa Tamil Sekolah Rendah juga ditawarkan bagi melatih guru-guru Bahasa Tamil untuk ditempatkan di sekolah kebangsaan (SK) bagi mengajar murid-murid keturunan India yang belajar di SK serta murid-murid daripada pelbagai keturunan yang minat untuk mempelajari Bahasa Tamil.

**PEMBERITAHUAN PERTANYAAN**  
**DEWAN RAKYAT MALAYSIA**  
**MESYUARAT PERTAMA, PENGGAL PERTAMA**

**PERTANYAAN** : LISAN  
**DARIPADA** : DATUK HAJI AHMAD JAZLAN BIN YAAKUB  
**KAWASAN** : MACHANG  
**TARIKH** : 28 NOVEMBER 2018

**SOALAN**

Datuk Haji Ahmad Jazlan Bin Yaakub [Machang] minta **MENTERI PERDAGANGAN ANTARABANGSA DAN INDUSTRI** menyatakan berapakah nilai eksport produk halal Malaysia ke negara luar dan negara manakah yang menjadi pengeksport terbesar produk halal Malaysia.

**JAWAPAN**

Tuan Yang di-Pertua,

1. Jumlah perdagangan Malaysia pada tahun 2017 mencatatkan pertumbuhan sebanyak 19.2% dengan mencapai RM 1.771 trilion berbanding RM 1.486 trilion pada tahun sebelumnya. Eksport meningkat sebanyak 18.8% kepada RM934.93 bilion manakala import turut merekodkan peningkat sebanyak 19.7% kepada RM 836.42 bilion.
2. Daripada jumlah keseluruhan eksport negara pada tahun 2017, eksport produk Halal meningkat sebanyak 2.9 peratus kepada RM 43.3 bilion berbanding RM 42.1 bilion pada tahun 2016. Antara produk Halal utama yang dieksport ke luar negara adalah makanan & minuman (RM20.1 bilion), ramuan Halal (RM 15.7 bilion) dan produk berasaskan minyak sawit (RM 2.6 bilion). Destinasi eksport utama negara bagi produk Halal pula adalah Singapura (RM4.93 billion), China (RM4.89 billion), Jepun (RM 2.82 bilion), Amerika Syarikat (RM 2.73 bilion) dan Indonesia (RM 2.22 bilion).
3. Peningkatan eksport produk halal ini adalah sejajar dengan peningkatan permintaan produk halal di peringkat global. Usaha Malaysia di dalam membangunkan industri Halal ini telah mengukuhkan kredibiliti negara serta memastikan setiap barang Halal yang diperakukan oleh Malaysia adalah berkualiti tinggi serta selamat digunakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN LARRY SOON @ LARRY SNG WEI SHIEN [JULAU]**

**TARIKH : 28 NOVEMBER 2018 (RABU)**

**SOALAN NO. 13**

Minta **MENTERI HAL EHWAL EKONOMI** menyatakan apakah kadar pengangguran untuk golongan belia bagi tahap pendidikan iaitu sekolah rendah, sekolah menengah dan universiti atau kolej.

**JAWAPAN**

**JAWAPAN :-**

Tuan Yang di-Pertua,

Untuk makluman Ahli Yang Berhormat, berdasarkan Laporan Penyiasatan Tenaga Buruh yang dikeluarkan oleh Jabatan Perangkaan Malaysia, kadar pengangguran nasional bagi tahun 2017 adalah sebanyak **3.4 peratus** atau bersamaan dengan **502,600 orang** dari jumlah keseluruhan 14.95 juta tenaga buruh (tenaga buruh warganegara: 12.68 juta; tenaga buruh bukan warganegara: 2.27 juta)

2. Kadar pengangguran bagi tahun 2017 untuk golongan belia iaitu pengangur yang dalam lingkungan umur 15 hingga 24 tahun adalah sebanyak **10.8 peratus** bersamaan dengan **283,400 orang**. Dari segi pencapaian pendidikan, kadar pengangguran dicatatkan sebanyak 16.1 peratus bagi mereka yang telah mencapai pendidikan di peringkat tertiar, 10.1 peratus bagi mereka yang telah mencapai pendidikan di peringkat sekolah menengah dan 5.0 peratus bagi mereka yang mencapai pendidikan sekolah rendah.
3. Antara punca pengangguran belia dan siswazah yang tinggi adalah disebabkan oleh ketidakpadanan dalam pasaran pekerja yang berpunca daripada perwujudan peluang pekerjaan berkemahiran tinggi yang terhad. Ini kerana, walaupun tahap pendidikan tenaga kerja semakin tinggi, peluang pekerjaan yang diwujudkan dalam ekonomi Malaysia masih tertumpu pada pekerjaan berkemahiran rendah dan sederhana (Laporan Tahunan Bank Negara, 2016).
4. Di samping itu, kadar pengangguran dalam kalangan mereka yang berpendidikan tertiar termasuk lepasan universiti dan kolej adalah lebih tinggi memandangkan kebanyakan mereka tiada atau kurang pengalaman kerja yang mana kebanyakan majikan menjadikannya sebagai salah satu kriteria tambahan dalam permohonan pekerjaan

berbanding bagi sektor pekerjaan separuh mahir dan berkemahiran rendah.

5. Beberapa usaha yang sedang dilaksanakan oleh Kerajaan untuk menangani isu pengangguran belia seperti berikut:

- i) Pertama, menambah baik **kecekapan pasaran buruh** melalui usaha meminimumkan ketidakpadanan dalam pasaran buruh dan mengenal pasti jurang kemahiran kritikal bagi perancangan modal insan masa hadapan;
- ii) Kedua, pekerja yang kehilangan pekerjaan akan dibantu dalam proses carian pekerjaan, penempatan dan latihan melalui program Dasar Pasaran Buruh Aktif. Latihan **reskilling** dan **upskilling** juga akan disediakan untuk membantu pekerja yang kehilangan pekerjaan bagi meningkatkan kemahiran mengikut keperluan industri;
- iii) Ketiga, mempergiat **kolaborasi dengan pihak industri** untuk menambah baik kualiti program di institusi TVET dan institusi pengajian tinggi; dan
- iv) Keempat, memperkuuh **pembelajaran sepanjang hayat** untuk peningkatan kemahiran bagi membolehkan penganggur belia mendapat latihan semula dan kemahiran secara berterusan untuk memenuhi permintaan pasaran buruh.

Sekian, terima kasih.  
28 November 2018

Kementerian Hal Ehwal Ekonomi

**SOALAN NO: 14**

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

PERTANYAAN : LISAN

DARIPADA : YB DATO' HAJI MOHD FASIAH BIN HAJI MOHD FAKEH

TARIKH : 28 NOVEMBER 2018

SOALAN :

**Dato' Haji Mohd Fasiah bin Haji Mohd Fakeh [ Sabak Bernam ]**  
minta **MENTERI TENAGA MANUSIA** menyatakan jumlah pekerjaan baru yang telah diwujudkan kepada golongan belia dan golongan B40 selepas Pakatan Harapan (PH) mengambil alih Kerajaan.

PR-1412-L02144

## **JAWAPAN**

Tuan Yang Di Pertua,

1. Mengikut rekod Jabatan Tenaga Kerja, bagi tempoh Januari 2018 sehingga 30 September 2018, sebanyak 167,639 pencari kerja aktif yang berdaftar dengan portal *JobsMalaysia*. Dari jumlah ini, seramai 119,496 adalah daripada golongan siswazah dan 48,143 adalah daripada golongan bukan siswazah.
  
2. Bagi tempoh Januari 2018 sehingga 30 September 2018, Kementerian ini melalui Jabatan Tenaga Kerja telah berjaya menempatkan secara keseluruhan seramai 136,575 ke dalam alam pekerjaan. Dari jumlah ini seramai 37,186 siswazah dan 99,389 bukan siswazah berjaya ditempatkan dalam pekerjaan

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN TEH KOK LIM [ TAIPING ]**

**TARIKH : 28 NOVEMBER 2018**

**SOALAN :**

Minta **MENTERI PELANCONGAN, SENI DAN BUDAYA** menyatakan berapakah peruntukan daripada Kementerian telah disalurkan ke Taiping untuk membangunkan industri pelancongan sejak tahun 2008 sehingga kini dan senaraikan program pembangunan tersebut serta tahap pencapaianya.

**JAWAPAN :**

Tuan Yang di-Pertua,

Kementerian Pelancongan, Seni Dan Budaya telah memperuntukkan sebanyak RM9,208,400 sejak tahun 2008 bagi menyiapkan lima (5) projek pembangunan pelancongan di bandar Taiping, Perak seperti berikut :

**2008 - 2010**

1. Pembangunan Kemudahan Pelancongan di Bukit Larut, Taiping, Perak (RM5,670,000);
2. Kemudahan Infrastruktur Untuk Pengunjung di Zoo Taiping - (Bumbung di Dataran Zoo Taiping) (RM1,988,400);
3. Pembangunan Kemudahan Pelancongan di Taman Tasik Taiping (RM800,000);
4. Menaiktaraf Bumbung di Hadapan Kaunter Tiket Zoo Taiping (Fasa 12) (RM100,000); dan

**2018**

5. Pembangunan *Ecotourism* di Pusat Eko-Pelajaran Hutan Paya Laut Matang, Taiping, Perak (RM650,000).

Tuan Yang di-Pertua,

Kementerian sentiasa memberi perhatian kepada produk-produk pelancongan yang berpotensi untuk dibangunkan atau dinaiktarafkan. Sehubungan itu, Kementerian sangat mengalu-alukan cadangan daripada Yang Berhormat demi memajukan produk-produk pelancongan khususnya di Taiping, Perak.

Sekian, terima kasih.

**PEMBERITAHUAN PERTANYAAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS (2018)**  
**DEWAN RAKYAT**

**PERTANYAAN : LISAN**

**DARIPADA : YB DATO' DR. MOHD KHAIRUDDIN BIN AMAN RAZALI [ KUALA NERUS ]**

**TARIKH : 28 NOVEMBER 2018 (RABU)**

**SOALAN:**

**Dato' Dr. Mohd Khairuddin bin Aman Razali [ Kuala Nerus ]** minta **PERDANA MENTERI** menyatakan usaha memerangi perlakuan LGBT yang menjadi punca utama penularan AIDS pada masa ini.

**JAWAPAN :** **(YB DATUK SERI DR MUJAHID YUSOF,  
MENTERI DI JABATAN PERDANA MENTERI)**

Tuan Yang Di-Pertua,

Berhubung usaha memerangi perlakuan LGBT yang menjadi punca utama penularan AIDS pada masa ini, Kerajaan melalui Jabatan Kemajuan Islam Malaysia (JAKIM) telah bekerjasama dengan pihak Kementerian Kesihatan Malaysia melalui Pelan Strategik Kebangsaan bagi Mengakhiri AIDS 2016-2030 dengan melaksanakan program advokasi dan penerangan kepada komuniti LGBT khususnya yang beragama Islam agar dapat menghindari perlakuan seks sesama jenis bagi mengelakkan jangkitan virus HIV dan AIDS.

Selain itu, JAKIM telah mengambil inisiatif menyantuni golongan LGBT dengan melaksanakan aktiviti temuseru (*outreach*) ke kawasan yang dikenalpasti serta mengajak mereka yang beragama Islam menyertai program rawatan dan pemulihan ('Ilaj wa Syifa') secara sukarela iaitu Program Mukhayyam dengan kerjasama Jabatan Agama Islam Negeri-

## NO SOALAN : 16

negeri (JAIN) dan Pertubuhan Bukan Kerajaan (NGO). Program Mukhayyam ini dilaksanakan dengan objektif seperti berikut:

- i. Membimbing dan memberikan kesedaran kerohanian/spiritual terhadap golongan LGBT melalui pendekatan agama (tauhid) untuk mereka menghadapi cabaran hidup serta kembali kepada kehidupan fitrah.
- ii. Memberikan pendedahan dan bimbingan ilmu fardu ain kepada golongan ini bagi melaksanakan tuntutan agama.
- iii. Memberikan pengetahuan dan kesedaran berkaitan kesihatan khususnya HIV dan lain-lain penyakit berjangkit.
- iv. Memberikan bimbingan motivasi serta kemahiran mempertingkatkan jatidiri.
- v. Menghapuskan stigma dan diskriminasi antara komuniti ini dengan golongan agama serta masyarakat sekeliling.

Selain itu, aktiviti susulan seperti usrah dan kelas pengajian turut dilaksanakan, sebagai suatu bentuk sokongan dan bimbingan yang berterusan (*peer support*) agar kesedaran melakukan perubahan adalah berpanjangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : TUAN STEVEN CHOONG SHIAU YOON**  
**[ TEBRAU ]**  
**TARIKH : 28 NOVEMBER 2018 (RABU)**

**SOALAN NO. 17**

Minta **MENTERI KESIHATAN** menyatakan sama ada Kementerian boleh membenarkan syarikat asing untuk menyertai tender bekalan ubat, tanpa perlu melalui syarikat tempatan.

**JAWAPAN**

**Yang di-Pertua,**

Urusan perolehan Kerajaan adalah tertakluk kepada peraturan-peraturan Kerajaan yang berkuatkuasa seperti Arahan Perbendaharaan dan Pekeliling Perbendaharaan yang dikeluarkan oleh Kementerian Kewangan. Prinsip perolehan adalah berasaskan kepada akauntabiliti awam, diuruskan secara telus, nilai faedah yang terbaik, saingen terbuka serta adil dan saksama.

**Yang di-Pertua,**

Urusan perolehan ubat – ubatan KKM adalah dilaksanakan sama ada secara tender terbuka, sebut harga dan lain – lain kaedah perolehan berpandukan kepada undang – undang dan peraturan perolehan yang dinyatakan di atas.

Berdasarkan kepada peraturan yang berkuatkuasa, syarikat farmaseutikal antarabangsa atau mana-mana syarikat pembekal / agen yang ingin menyertai tawaran tender ubat Kerajaan perlu berdaftar dengan Kementerian Kewangan.

Syarikat farmaseutikal antarabangsa yang berdaftar di Malaysia pada kebiasaan tidak berurusan terus dengan Kerajaan dalam urusan tender-tender ubat Kerajaan. Syarikat farmaseutikal antarabangsa lebih cenderung melantik syarikat pembekal / agen tempatan untuk menguruskan urusan tender, perkhidmatan logistik dan pentadbiran kontrak. Ini adalah selaras dengan polisi kerajaan untuk memperkasakan dan meningkatkan daya saing syarikat tempatan. Syarikat farmaseutikal antarabangsa yang tidak menubuhkan syarikat berdaftar di Malaysia, boleh menyertai tender antarabangsa secara terus. Walau bagaimanapun, tender antarabangsa hanya boleh dipelawa bagi bekalan yang tidak dapat diperolehi di dalam negara seperti mana termaktub dalam tatacara Perolehan Kerajaan yang ditetapkan oleh Kementerian Kewangan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ALEXANDER NANTA LINGGI  
[ KAPIT ]**

**TARIKH : 28 NOVEMBER 2018 (RABU)**

**SOALAN NO. 18**

Minta **MENTERI HAL EHWAL EKONOMI** menyatakan secara terperinci kesemua senarai projek infrastruktur seperti jalan-jalan, bekalan elektrik luar bandar, bekalan air luar bandar, yang telah diluluskan untuk pelaksanaan oleh Kerajaan yang terdahulu tetapi sekarang ditangguhkan pelaksanaannya di Negeri Sarawak.

**JAWAPAN**

Tuan Yang di-Pertua,

Seperti jawapan saya pada sesi yang lalu, Kerajaan akan sentiasa memberi perhatian kepada kemakmuran rakyat di seluruh Negara termasuk negeri Sarawak. Kerajaan akan sentiasa memastikan kesejahteraan rakyat terus menjadi keutamaan.

Bagi memastikan kesejahteraan dan taraf hidup rakyat terus terpelihara terutamanya di kawasan luar bandar, pelaksanaan projek-projek yang memberikan manfaat terus kepada rakyat iaitu projek-projek yang bersifat mesra rakyat dan berimpak tinggi seperti jalan raya, jambatan, bekalan air, bekalan elektrik, keselamatan, kesihatan, sekolah, rumah ibadat dan sebagainya akan diteruskan.

Untuk makluman Yang Berhormat Kapit, berdasarkan surat UPE, MEA pada 7 Jun 2018 dan sesi libat urus *Contract Coordination Panel* (CCP) Khas Kementerian sehingga 31 Oktober 2018, sebanyak 45 projek dengan kos sebanyak RM5.8 bilion ditangguhkan pelaksanaannya di Sarawak. Terdapat 1 projek dibatalkan pelaksanaan berdasarkan perakuan CCP Khas Kementerian Kesihatan dengan kos sebanyak RM30 juta.

Walau bagaimanapun, Kerajaan dari semasa ke semasa mengadakan semakan semula sama ada meneruskan, menangguh dan membatalkan pelaksanaan sesuatu projek di bawah Belanja Pembangunan berdasarkan kemampuan kewangan Kerajaan pada masa akan datang.

Sekian, terima kasih.

28 November 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TIEN FATT @ WONG NYUK FOH [SANDAKAN]**

**TARIKH : 28 NOVEMBER 2018 [ RABU ]**

**SOALAN NO. 19**

Minta **MENTERI PERUMAHAN DAN KERAJAAN TEMPATAN** menyatakan adakah Kerajaan Persekutuan merancang memperkenalkan skim sewa-beli di seluruh Projek Perumahan Rakyat (PPR) di Malaysia khasnya di Sabah.

**JAWAPAN**

Yang di-Pertua,

1. Untuk makluman Yang Berhormat, Skim Sewa Untuk Dimiliki Atau *Rent to Own* (RtO) untuk Program Perumahan Rakyat (PPR) merupakan skim pembiayaan mudah yang ditawarkan kepada pemohon atau bakal pembeli yang gagal mendapatkan pembiayaan daripada mana-mana institusi kewangan. Kementerian Perumahan dan Kerajaan Tempatan (KPKT) telah mengguna pakai konsep RtO di PPR Gua Musang, PPR Taman Danau, Kg Hassan, PPR Taman Siliau Jaya, PPR Lembah Subang 2, PPR Sri Aman Kepong, PPR Sentul Murni dan PPR Kota Bharu. KPKT sedia berbincang dengan pihak Kerajaan Negeri untuk mempertimbangkan sebarang permohonan pelaksanaan Skim RtO di PPR oleh pihak Kerajaan Negeri termasuklah di Negeri Sabah.
2. Untuk makluman Yang Berhormat juga, pada masa ini, melalui Dasar Perumahan Negara (2018-2025), perumahan PPR di kawasan-kawasan bandar akan dikhaskan untuk tujuan penyewaan bagi memberi peluang kepada masyarakat bandar yang berpendapatan rendah (B40) dan golongan migrasi ke bandar untuk mendiami rumah PPR Disewa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA, PENGGAL PERTAMA,**  
**PARLIMEN KEEMPAT BELAS**

**PERTANYAAN :** **LISAN**

**DARIPADA :** **DATO' SRI AZALINA OTHMAN SAID**  
**[ PENGERANG ]**

**TARIKH :** **28 NOVEMBER 2018 (RABU)**

**SOALAN NO. 20**

Dato' Sri Azalina Othman Said [ Pengerang ] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status penubuhan Suruhanjaya Kanak-Kanak untuk memainkan peranan sebagai *watchdog* yang bebas dan berkanun dalam memantau isu serta polisi melibatkan kanak-kanak di Malaysia dan adakah Suruhanjaya ini akan ditubuhkan di bawah suatu Akta Parlimen yang baharu.

**JAWAPAN**

Tuan Yang di-Pertua,

Kerajaan telah mengadakan beberapa sesi perbincangan bersama SUHAKAM mengenai cadangan penubuhan Suruhanjaya Kanak-Kanak sebagai badan bebas yang dapat memantau dan melaporkan pelaksanaan hak asasi kanak-kanak di negara ini bagi memelihara hak setiap kanak-kanak.

Pada 23 November 2018, Kementerian bersama pihak SUHAKAM telah mengadakan satu sesi konsultasi melibatkan Badan Bukan Kerajaan, Majlis Kebangsaan Bagi Kanak-Kanak, agensi Kerajaan, UNICEF dan individu berkaitan, termasuk Ahli-Ahli Parlimen. Sesi konsultasi ini diadakan bertujuan untuk mendapatkan pandangan dan idea daripada pemegang taruh mengenai pelantikan Pesuruhjaya Kanak-Kanak di bawah SUHAKAM termasuk mengenal pasti peranan dan struktur pelaporan yang akan dilaksanakan oleh Pesuruhjaya Kanak-Kanak.

Secara ringkas, cadangan fungsi Pesuruhjaya Kanak-Kanak yang dibentangkan oleh SUHAKAM dalam sesi konsultasi tersebut merangkumi:

- i. Advokasi dan pendidikan berkaitan hak kanak-kanak;
- ii. Menasihati dan membantu Kerajaan dalam penggubalan undang-undang serta arahan pentadbiran;
- iii. Mengemukakan syor kepada Kerajaan mengenai ratifikasi Konvensyen dan instrumen antarabangsa termasuklah penarikbalikan reservasi Konvensyen Mengenai Hak Kanak-Kanak (CRC); dan
- iv. Menyiasat aduan berhubung pelanggaran hak asasi kanak-kanak.

Cadangan yang dikemukakan oleh SUHAKAM akan diteliti dengan lebih mendalam oleh pihak Kementerian.

Dengan mengambil kira pandangan pemegang taruh ini, KPWKM berharap Kerajaan mampu melantik Pesuruhjaya yang berkesan dan efektif untuk meningkatkan kesejahteraan kanak-kanak di Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[SETIAWANGSA]**

**TARIKH : 28 NOVEMBER 2018 (RABU)**

**SOALAN NO. 21**

Minta **MENTERI PENDIDIKAN** menyatakan :-

- (a) apakah kajian yang dilaksanakan untuk menambah bilangan guru Bahasa Inggeris di sekolah-sekolah rendah dan menengah selaras dengan hasrat Kerajaan memandangkan bilangan guru yang kurang dalam sesebuah sekolah ; dan
- (b) apakah impak program Highly Immersive Program untuk penguasaan Bahasa Inggeris.

**JAWAPAN**

Yang di-Pertua,

- (a) Kementerian Pendidikan Malaysia (KPM) sentiasa memastikan keperluan guru bagi semua mata pelajaran termasuklah Bahasa Inggeris sentiasa mencukupi. Anggaran keperluan guru mengikut opsyen bagi sesuatu mata pelajaran dibuat berdasarkan peruntukan waktu yang diputuskan dalam Jawatankuasa Kurikulum Pusat, norma perjawatan guru, kelulusan perjawatan pada tahun semasa, jumlah guru mengikut opsyen yang berada dalam sistem, serta perubahan dasar dan program pendidikan.

## **SOALAN NO: 21**

Antara usaha memastikan bekalan guru terlatih mengikut opsyen sentiasa mencukupi dilaksanakan melalui pelbagai program latihan perguruan seperti Ijazah Sarjana Muda Perguruan di Institut Pendidikan Guru dan Ijazah Sarjana Muda Pendidikan di Institusi Pengajian Tinggi Awam.

KPM berusaha untuk memenuhi keperluan guru melalui penempatan semula guru sekiranya guru opsyen tersebut terdapat di dalam sistem. Pengisian guru terlatih akan dibuat secara berperingkat-peringkat dari semasa ke semasa. Dengan adanya langkah-langkah ini, KPM menjangkakan keperluan guru mengikut opsyen di sekolah KPM dapat dipenuhi.

- (b) Sasaran impak *Highly Immersive Programme* (HIP) ialah pembentukan persekitaran serta budaya pembelajaran bahasa Inggeris yang positif yang membolehkan murid menggunakan bahasa Inggeris dengan yakin, penerimaan positif terhadap pembelajaran dan penggunaan bahasa Inggeris oleh murid dan bagi tempoh jangka panjang, murid dapat memperkuuhkan penguasaan bahasa Inggeris.

Berdasarkan kajian yang dijalankan pada tahun 2017, melibatkan sebanyak 1,200 buah sekolah daripada kohort pertama HIP, didapati bahawa sebanyak 644 buah sekolah telah menampakkan dengan jelas budaya pembelajaran serta penggunaan bahasa Inggeris yang baik melalui penemuan berikut:

1. Murid melibatkan diri dalam aktiviti bahasa Inggeris kesan daripada pelbagai peluang yang menarik dalam dan luar kelas.
2. Murid berinteraksi dalam bahasa Inggeris sepanjang tahun.
3. Warga sekolah secara keseluruhan berusaha menggunakan bahasa Inggeris semasa berinteraksi dengan murid di sekolah.
4. Pelibatan guru subjek selain guru bahasa Inggeris dalam aktiviti bahasa Inggeris sekolah.
5. Pelibatan ibu bapa dan komuniti yang menyumbang kemahiran mereka semasa aktiviti bahasa Inggeris sekolah adalah pada tahap yang memuaskan dalam aktiviti luar kelas.

## **SOALAN NO: 21**

Selain daripada itu, dapatan kajian juga mendapati bahawa sebanyak 46 buah sekolah telah berjaya membina persekitaran serta budaya pembelajaran bahasa Inggeris yang cukup mantap, pelajar terdedah kepada pembelajaran serta penggunaan bahasa Inggeris di dalam dan luar kelas sepanjang tahun. Warga sekolah amat berkeyakinan dan mahu berinteraksi dalam bahasa Inggeris. Sekolah-sekolah ini mampu menjadi contoh kepada sekolah-sekolah lain dalam amalan terbaik bahasa Inggeris.

Sekian, terima kasih.

RJM120

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN LIM LIP ENG**  
**[KEPONG]**  
**TARIKH : 28 NOVEMBER 2018 (RABU)**

**SOALAN NO. 22**

**Y.B. TUAN LIM LIP ENG [ KEPONG ]** minta **MENTERI KEWANGAN** menyatakan sepuluh kontrak berat sebelah yang bernilai paling tinggi yang ditandatangani ketika pemerintahan Kerajaan Barisan Nasional. Apakah langkah-langkah yang diambil Kerajaan tentang kontrak-kontrak tersebut untuk mengurangkan kerugian negara.

**JAWAPAN**

Tuan Yang Di Pertua,

Untuk makluman Yang Berhormat, bagi memastikan pengurusan kontrak teratur, semua kontrak perlu disemak oleh Penasihat Undang-Undang Kementerian/Agensi masing-masing sebelum kontrak tersebut ditandatangani. Ini bertujuan memastikan setiap klausa kontrak jelas menyatakan obligasi kedua-dua pihak dan bagi menjaga kepentingan Kerajaan.

Kerajaan juga telah menyediakan kontrak piawai seperti *Public Work Department- PWD203* bagi perolehan kerja, *Consultant Services Agreement-CSA* untuk perolehan perkhidmatan perunding dan kontrak piawai perkhidmatan kawalan keselamatan demi memastikan hak Kerajaan terpelihara.

Selain itu, Kementerian Kewangan telah menyediakan platform *Contract Coordination Panel (CCP)* di bawah Kementerian masing-masing untuk mengadakan perbincangan dengan semua pihak yang terlibat dalam kontrak perolehan tersebut bagi mengenalpasti tindakan bersesuaian yang boleh dilaksanakan berdasarkan terma kontrak yang telah dipersetujui atau persetujuan bersama ke atas terma baharu.

Kementerian Kewangan pada 29 Oktober 2018 telah memutuskan semua Kementerian dan Agensi untuk mengadakan rundingan harga dengan pengurangan sekurang-kurangnya 10% bagi projek/kontrak yang telah dikeluarkan Surat Setuju Terima bernilai RM10 juta ke atas bagi memastikan nilai kontrak perolehan yang dilaksanakan secara rundingan terus dan tender terhad sebelum ini lebih munasabah.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD BIN HASSAN [PAPAR]**

**TARIKH : 28 NOVEMBER 2018 [ RABU ]**

**SOALAN NO. 23**

Minta **MENTERI PERUMAHAN DAN KERAJAAN TEMPATAN** menyatakan memandangkan kawasan Parlimen Papar adalah sangat luas, adakah Kementerian bercadang **membina mini balai bomba di tempat-tempat strategik seperti di Kinarut dan di Benoni Commercial Centre** bagi mengurangkan kerugian yang bakal dialami oleh penduduk-penduduk yang terlibat dengan kebakaran.

**JAWAPAN**

Tuan Yang di-Pertua,

1. Untuk makluman Yang Berhormat, kawasan **Kinarut** mendapat perlindungan kebakaran dari **Balai Bomba dan Penyelamat Papar** dengan jarak perjalanan sejauh **21 kilometer**.
2. Khidmat kebombaan di **kawasan Kinarut** kini dibantu oleh **Pasukan Bomba Sukarela Lok Kawi** sejauh **7 kilometer** dengan kekuatan **33 anggota** yang dilengkapi dengan peralatan pemadam. Selain itu, Kementerian Perumahan dan Kerajaan Tempatan (KPKT) juga telah mengenal pasti satu tapak yang dirizabkan untuk pembinaan balai bomba dan permohonan projek balai bomba baru di Kinarut akan dibuat dalam Rancangan Malaysia Ke-11, *Rolling Plan* Ke-5, Tahun 2020.
3. Mengenai khidmat kebombaan di kawasan **Benoni Commercial Centre**, jarak dari **Balai Bomba dan Penyelamat Papar** adalah sejauh **4.5 kilometer** yang mengambil masa **8 minit**. Memandangkan jarak balai bomba adalah amat dekat, KPKT berpandangan bahawa Balai Bomba dan Penyelamat Papar masih mampu untuk menangani sebarang insiden di kawasan tersebut.
4. Sehubungan itu, Jabatan Bomba dan Penyelamat Malaysia Negeri Sabah akan mengadakan kempen kesedaran keselamatan kebakaran di kawasan bagi tujuan mencegah bahaya kebakaran di samping menggalakkan penyertaan Skim Teman Pili Bomba dan penubuhan Bomba Komuniti dalam kalangan pemunya premis perniagaan serta penduduk yang berhampiran dengan **Benoni Commercial Centre**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. NIK MUHAMMAD ZAWAWI BIN  
HAJI SALLEH  
[ PASIR PUTEH ]**

**TARIKH SOALAN : 28 NOVEMBER 2018 [RABU]**

**SOALAN NO.24**

Minta **MENTERI PEMBANGUNAN USAHAWAN** menyatakan adakah Kementerian berhasrat untuk mengambil alih fungsi keusahawanan yang turut dijalankan oleh kementerian-kementerian lain (MOA, KPDNHEP, dan lain-lain) setelah dimansuhkan Kementerian ini pada tahun 2009 supaya pembangunan keusahawanan di Malaysia lebih berfokus.

**JAWAPAN**

Tuan Yang Dipertua,

Sebagai Kementerian yang bertanggungjawab ke atas pembangunan usahawan, bidang kuasa Kementerian ini merangkumi kesemua isu berkaitan, bagi memastikan halatuju pembangunan keusahawanan di negara ini adalah bersepada dan lebih tertumpu. Setakat ini, Kementerian ini telah diamanahkan dan dipertanggungjawabkan untuk mengambil alih beberapa agensi dan Bahagian yang dahulunya terletak di bawah Kementerian-kementerian lain seperti:

- (i) Bahagian Pembangunan Usahawan (daripada Kementerian Perdagangan Antarabangsa dan Industri, MITI);
- (ii) Bahagian *Business Licensing Electronic Support System* atau BLESS (daripada Unit Pemodenan Tadbiran dan Perancangan Pengurusan, MAMPU) ;
- (iii) Bahagian Pembangunan Kapasiti, Penggalakan & Pembudayaan Usahawan;
- (iv) Bahagian Pembangunan Kontraktor dan Usahawan (daripada Kementerian Kerja Raya, KKR);
- (v) Bahagian Pembangunan SME dan Mikro Kredit (daripada Jabatan Perdana Menteri, JPM);
- (vi) Bahagian Pembangunan Koperasi (daripada Kementerian Perdagangan Dalam Negeri dan Hal Ehwal Pengguna, KPDNHEP).
- (vii) Tekun Nasional;
- (viii) Institut Keusahawanan Negara (INSKEN);
- (ix) SME Corp Malaysia;
- (x) Suruhanjaya Koperasi Malaysia (SKM);
- (xi) Maktab Koperasi Malaysia (MKM);
- (xii) Bank Rakyat;
- (xiii) SME Bank;
- (xiv) UDA Holdings;
- (xv) *Malaysian Global Innovation and Creativity Centre* (MAGIC); dan
- (xvi) Skim Latihan 1Malaysia (SL1M).

Kebanyakan daripada agensi-agensi dan Bahagian-bahagian berkaitan dahulunya merupakan sebahagian daripada Kementerian Pembangunan Usahawan dan Koperasi yang telah dimansuhkan pada tahun 2009. Pewujudan kembali Kementerian ini amat penting bagi memastikan pelaksanaan program-program keusahawanan dan PKS dilaksanakan

secara lebih efektif dan tidak lagi bertindih antara satu sama lain. Selain itu, ianya juga dapat mewujudkan satu ekosistem keusahawanan yang lebih holistik sejajar dengan aspirasi Kerajaan untuk mewujudkan lebih ramai usahawan tempatan.

Namun, tidak boleh dinafikan masih terdapat beberapa Kementerian lain yang menjalankan aktiviti keusahawanan seperti:

- (i) Kementerian Pembangunan Luar Bandar (KPLB);
- (ii) Kementerian Belia dan Sukan (KBS); dan
- (iii) Kementerian Pertanian dan Industri Asas Tani (MOA).

MED akan bekerjasama dengan semua kementerian tersebut bagi mencapai matlamat yang telah dimandatkan. Kementerian-kementerian tersebut juga merupakan ahli kepada Majlis Pembangunan Usahawan dan PKS Kebangsaan (*National Entrepreneurship and SME Development Council*, NESDC) yang akan dipengerusikan oleh YAB Perdana Menteri.

Sekian, terima kasih

---

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**  
**15 OKTOBER HINGGA 11 DISEMBER 2018**

**PERTANYAAN : PERTANYAAN-PERTANYAAN JAWAB LISAN**

**DARIPADA : PUAN NOORITA BINTI SUAL**  
**[TENOM]**

**TARIKH : 28 NOVEMBER 2018**

**SOALAN :**

minta **MENTERI INDUSTRI UTAMA** menyatakan sejauh manakah ekonomi negara terkesan akibat kejatuhan harga getah masa kini dan adakah Kerajaan menyediakan bantuan khas kejatuhan harga getah kepada lebih 100,000 pekebun kecil di seluruh negara.

**JAWAPAN:**

Tuan Yang Di-Pertua,

Secara makro, Keluaran Dalam Negeri Kasar pada harga tetap 2010 bagi suku kedua 2018 (April hingga Jun) menunjukkan komoditi getah mencatatkan pertumbuhan negatif pada kadar 5.8 berbanding suku kedua tahun 2017. Manakala bagi separuh pertama 2018 (Jan hingga Jun), komoditi getah mencatatkan pertumbuhan negatif sebanyak 11.2% berbanding separuh pertama 2017. Pertumbuhan negatif ini disumbang oleh pengeluaran dan harga getah yang rendah berbanding tahun lepas.

Kejatuhan harga getah sejak awal tahun 2018 sudah pasti memberi tekanan kepada lebih 440,000 pekebun kecil getah yang rata-ratanya bergantung kepada hasil tanaman getah. Kerajaan memandang serius terhadap perkara ini dan telah mengambil pelbagai langkah bagi mengurangkan beban pendapatan pekebun kecil getah. Dalam hal ini, Kementerian telah menyediakan beberapa bantuan kepada pekebun kecil dengan melaksanakan langkah-langkah berikut:

- (i) pelaksanaan Insentif Pengeluaran Getah (IPG) untuk menangani kesan kejatuhan harga getah ke atas pendapatan pekebun kecil di samping menggalakkan pekebun kecil untuk terus menoreh sewaktu harga rendah di pasaran. Langkah ini akan membolehkan para pekebun kecil getah dengan pemilikan purata 2 hektar dan produktiviti *cuplump* sebanyak 3,000 kilogram/hektar/tahun menikmati pendapatan bulanan sebanyak RM1,100;
- (ii) Pihak Berkuasa Kemajuan Pekebun Kecil Perusahaan Getah (RISDA) telah membuat kutipan ses sebanyak 14 sen bertujuan untuk Skim Tanam Semula (STS) oleh RISDA dan aktiviti penyelidikan dan pembangunan (R&D) oleh LGM. Namun, kutipan ses getah tersebut telah dipulangkan kepada pekebun kecil getah bagi meringankan beban pendapatan mereka semasa kejatuhan harga komoditi ini. Pemulangan ses dilaksanakan apabila purata harga bulanan SMR20

FOB pada bulan sebelumnya mencecah di bawah paras RM5.50 sekilogram. Bayaran ses ini akan disalurkan kepada pekebun kecil getah bersama-sama IPG;

- (iii) melaksanakan mekanisme penetapan harga di ladang dengan menyediakan peruntukan sebanyak RM6.4 juta sebagai modal pusingan kepada koperasi-koperasi untuk tujuan urus niaga getah. Langkah ini dapat meningkatkan harga pembelian getah di peringkat ladang dengan mengurangkan lapisan pembeli. Pengurangan orang tengah membantu pekebun-pekebun kecil getah mendapat harga yang munasabah dan *remunerative*; dan
- (iv) memperuntukkan RM12 juta bagi melaksanakan program untuk menggalakkan pengeluaran lateks tempatan. Peruntukan ini akan digunakan untuk memperkuatkan infrastruktur kutipan lateks. Penglibatan pekebun kecil dalam pengeluaran lateks akan dapat meningkatkan pendapatan mereka memandangkan harga lateks adalah lebih tinggi berbanding *cuplump*. Di samping itu, program ini juga dijangka dapat menampung permintaan lateks dalam negara dan mengurangkan pengimportan lateks bagi industri sarung tangan.

Sekian terima kasih.

**PEMBERITAHUAN PERTANYAAN MESYUARAT KEDUA,**  
**PENGGAL PERTAMA, PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : DATO' SRI DR. HAJI ISMAIL BIN  
MOHAMED SAID (KUALA KRAU)**

**TARIKH : 28 NOV 2018 (RABU)**

**SOALAN**

Minta **MENTERI PERTAHANAN** menyatakan kesan penutupan operasi Pusat Keamanan Antarabangsa Raja Salman (KSCIP), serta penarikan balik tentera Malaysia di Arab Saudi. Adakah ianya langkah yang tepat dan tidak menjelaskan hubungan dua hala antara Malaysia dan Arab Saudi.

**JAWAPAN**

Tuan Yang di-Pertua,

Keputusan yang diambil ini telah diperjelaskan kepada kerajaan Arab Saudi dan ianya tidak menjelaskan hubungan antara kedua-dua negara. Kerajaan akan terus meningkatkan lagi kerjasama dengan Arab Saudi dalam pelbagai bidang yang mempunyai kepentingan bersama.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**  
**15 OKTOBER HINGGA 11 DISEMBER 2018**

**PERTANYAAN : PERTANYAAN-PERTANYAAN JAWAB LISAN**

**DARIPADA : TUAN AHMAD TARMIZI BIN SULAIMAN  
[SIK]**

**TARIKH : 28 NOVEMBER 2018**

**SOALAN :**

minta **MENTERI INDUSTRI UTAMA** menyatakan apakah halangan pihak Kementerian untuk menetapkan harga lantai getah yang munasabah bagi melindungi hak dan pendapatan pekebun getah yang terjejas teruk akibat kejatuhan harga komoditi getah serta langkah untuk membasi kemiskinan di kalangan penoreh getah dan pekebun kecil.

**JAWAPAN:**

Tuan Yang Di-Pertua,

Pada masa ini, Kerajaan tidak bercadang untuk menetapkan harga lantai getah sekerap. Ini kerana pelaksanaan harga lantai akan memberikan impak kewangan yang besar kepada Kerajaan. Kerajaan tidak dapat mempertimbangkan cadangan mewujudkan harga lantai berdasarkan kepada faktor-faktor berikut:

- i. Penetapan harga lantai memerlukan sumber kewangan yang tinggi bagi menyokongnya sekiranya harga getah asli dunia mengalami tren penurunan yang mendadak;
- ii. Menyediakan ruang kepada aktiviti spekulasi harga dalam kalangan para penjual getah dengan menekan harga ke paras rendah dan mengharapkan Kerajaan akan menampung perbezaan di antara harga pasaran dan harga lantai; dan
- iii. Menyediakan ruang kepada aktiviti penyeludupan getah dari luar negara memandangkan harga tempatan adalah lebih tinggi berbanding dengan harga antarabangsa.

Walau bagaimanapun, Kerajaan telah melaksanakan pemberian Insentif Pengeluaran Getah (IPG) bermula tahun 2015 untuk meringankan beban pendapatan pekebun kecil di samping memberi galakan kepada pekebun kecil untuk terus menoreh sewaktu harga getah rendah di pasaran. Insentif ini hampir sama dengan konsep harga lantai kerana IPG akan diaktifkan apabila purata harga bulanan SMR 20 pada bulan sebelumnya kurang dari RM5.50 sekilogram atau harga di ladang untuk getah sekerap adalah di bawah RM2.20 sekilogram. Perbezaan harga akan ditampung oleh Kerajaan bagi pengeluaran yang dihasilkan oleh pekebun kecil.

Tuan Yang Di-Pertua,

Kerajaan amat prihatin dengan kebijakan pekebun kecil getah terutamanya ketika berlaku kejatuhan harga getah. Antara langkah-langkah yang diambil oleh Kerajaan untuk membantu pekebun kecil getah menangani pengurangan pendapatan apabila berlaku kejatuhan harga getah adalah seperti berikut:

- (i) pelaksanaan Insentif Pengeluaran Getah (IPG) untuk menangani kesan kejatuhan harga getah ke atas pendapatan pekebun kecil di samping menggalakkan pekebun kecil untuk terus menoreh sewaktu harga rendah di pasaran. Langkah ini akan membolehkan para pekebun kecil getah dengan pemilikan purata 2 hektar dan produktiviti *cuplump* sebanyak 3,000 kilogram/hektar/tahun menikmati pendapatan bulanan sebanyak RM1,100;
- (ii) melaksanakan mekanisme penetapan harga di ladang dengan menyediakan peruntukan sebanyak RM6.4 juta sebagai modal pusingan kepada koperasi-koperasi untuk tujuan urus niaga getah. Langkah ini dapat meningkatkan harga pembelian getah di peringkat ladang dengan mengurangkan lapisan pembeli. Pengurangan orang tengah membantu pekebun-pekebun kecil getah mendapat harga yang munasabah dan *remunerative*; dan
- (iii) Pihak Berkuasa Kemajuan Pekebun Kecil Perusahaan Getah (RISDA) telah membuat kutipan ses sebanyak 14 sen bertujuan untuk Skim Tanam Semula (STS) oleh RISDA dan aktiviti penyelidikan dan pembangunan (R&D) oleh LGM. Namun, kutipan ses getah tersebut telah dipulangkan kepada pekebun kecil getah bagi meringankan beban pendapatan mereka semasa kejatuhan harga komoditi ini. Pemulangan ses dilaksanakan apabila purata harga bulanan SMR20 FOB pada bulan sebelumnya mencecah di bawah paras RM5.50 sekilogram. Bayaran ses ini akan disalurkan kepada pekebun kecil getah bersama-sama IPG.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN RUSNAH BINTI ALUAI  
[ TANGGA BATU ]**

**TARIKH : 28 NOVEMBER 2018 (RABU)**

**SOALAN NO. 29**

Minta **MENTERI PERTANIAN DAN INDUSTRI ASAS TANI** menyatakan bagaimana Kementerian menyelesaikan konflik lambakan beras import, penyeludupan beras dan permintaan rendah terhadap padi tempatan serta memastikan kebijakan pesawah padi dilindungi.

**JAWAPAN**

Tuan Yang Dipertua,

Kerajaan sentiasa memberi keutamaan kepada penghasilan padi tempatan bagi menampung keperluan dalam negara. Pada masa ini, kemasukan beras import adalah dikawal melalui mekanisme kuota dan lesen import oleh Kerajaan bagi menampung ketidakcukupan penghasilan padi dalam negara. Secara purata, Kerajaan hanya mengimport sekitar 700,000 hingga 800,000 metrik tan setahun iaitu 30% daripada keperluan negara sebanyak kira-kira 2.5 juta metrik tan setahun.

Kerajaan juga sentiasa mengawal ketat kegiatan penyeludupan beras. Antara inisiatif yang telah dilaksanakan termasuklah:

- (i) Menubuhkan Jawatankuasa Khas Membanteras Penyeludupan Beras yang dianggotai oleh agensi-agensi penguatkuasa seperti Agensi Keselamatan Sempadan (AKSEM), Jabatan Kastam, Agensi Penguatkuasa Maritim Malaysia (APMM), MAQIS dan lain-lain;
- (ii) Menetapkan sebelas (11) pelabuhan utama negara bagi kemasukan beras import ke dalam negara;
- (iii) Melaksanakan kawalan pergerakan beras di dalam negara melalui mekanisme Permit Pemindahan Beras yang dikeluarkan oleh Kementerian; dan
- (iv) Melaksanakan tugas-tugas penguatkuasaan secara berkala oleh Seksyen Kawalselia Padi dan Beras, Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN PRABAKARAN A/L  
PARAMESWARAN**  
**[BATU]**  
**TARIKH : 28 NOVEMBER 2018 (RABU)**

**SOALAN NO. 31**

**Y.B. TUAN PRABAKARAN A/L PARAMESWARAN [ BATU ]** minta **MENTERI KEWANGAN** menyatakan apakah jaminan Kementerian kepada peserta yang telah menyelesaikan hutang Agensi Kaunseling dan Pengurusan Kredit (AKPK) agar mendapat peluang memohon pinjaman dari agensi perbankan untuk masa akan datang.

**JAWAPAN**

Tuan Yang di-Pertua,

Untuk makluman Ahli Yang Berhormat, bagi peserta Program Pengurusan Kredit (PPK) yang telah berjaya menyelesaikan semua pinjaman yang distrukturkan/ dijadualkan semula oleh AKPK, maklumat kredit mereka akan dikemaskini oleh institusi kewangan untuk menunjukkan obligasi hutang mereka telah dijelaskan sepenuhnya. Ini akan membolehkan mereka membuat permohonan pinjaman daripada mana-mana institusi kewangan tanpa sebarang kekangan. Walau bagaimanapun, keputusan permohonan pinjaman berkenaan adalah tertakluk kepada penilaian kredit oleh institusi kewangan, termasuk penilaian kemampuan peminjam untuk membayar balik pinjaman.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' DR. HAJI NOOR AZMI BIN  
GHAZALI [ BAGAN SERAI ]**

**TARIKH : 28 NOVEMBER 2018 (RABU)**

**SOALAN NO. 32**

Minta **MENTERI PERTANIAN DAN INDUSTRI ASAS TANI** menyatakan apakah sebab-sebab utama hasil padi yang berkurangan di kebanyakan jelapang padi negara mutakhir ini dan apakah inisiatif baru Kementerian untuk menangani masalah yang menggugat pendapatan pesawah dan juga bakal menggugat makanan negara ini.

**JAWAPAN**

Tuan Yang Dipertua,

Secara keseluruhan, jumlah pengeluaran padi negara bagi tahun 2017 meningkat 5.9% berbanding 2016. Bagaimanapun, antara sebab utama hasil padi berkurangan di beberapa buah jelapang padi negara mutakhir ini ialah:

- i. Serangan perosak dan penyakit yang berlaku pada tahun 2017. Serangan perosak dan penyakit utama ini menyebabkan penurunan hasil padi; dan
- ii. Ketidakcekapan bekalan air ke sistem pengairan dan sawah padi. Keperluan serta bekalan air ke sawah terganggu apabila sistem pam tidak beroperasi sepenuhnya akibat daripada paras

air sungai yang rendah terutama pada musim kemarau ataupun luar musim.

Inisiatif baru Kementerian untuk menangani masalah yang menggugat pendapatan pesawah dan juga bakal menggugat makanan negara ini ialah:

- i. melaksanakan penyelidikan dan pembangunan (R&D) secara berterusan melalui pengenalan kepada varieti benih baru seperti MARDI Siraj 297, MR303, MR 307, UKM RC-2 dan UKM RC-8. Pengenalan varieti baru dapat meningkatkan hasil dan rintang (tahan) kepada penyakit;
- ii. memperuntukkan sebanyak RM150 juta di bawah RMKe11 untuk pelaksanaan mekanisasi dan automasi bagi industri padi;
- iv. pengukuhan infrastruktur pengairan dan saliran bagi Kawasan Pembangunan Pertanian Bersepadu (IADA) di mana sebanyak RM1.395 billion diperuntukan di bawah RMKe11;
- v. penggunaan benih padi sah di mana sebanyak RM75 juta diperuntukan pada setiap tahun bagi memastikan benih padi berkualiti dibekalkan kepada pesawah;
- vi. meningkatkan kecekapan input bagi memastikan peningkatan produktiviti tanaman padi seperti meningkatkan kesuburan tanah melalui soil profiling; dan
- vii. Pemantapan sistem pengembangan pertanian dan pengairan seperti pakej teknologi peningkatan hasil, pengurusan perosak bersepadu, penggunaan sistem teknologi maklumat (ICT) dan aplikasi mudah alih dalam menjalankan pemantauan aktiviti pertanian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. MICHAEL TEO YU KENG  
[ MIRI ]**

**TARIKH : 28 NOVEMBER 2018 [ RABU ]**

**SOALAN NO. 33**

Minta **MENTERI PERUMAHAN DAN KERAJAAN TEMPATAN** menyatakan berapakah **bilangan rumah mampu milik yang akan dibina di kawasan Miri** pada tahun yang akan datang untuk membantu penduduk dalam golongan B40 di kawasan Miri.

**JAWAPAN**

Yang di-Pertua,

1. Untuk makluman Yang Berhormat, dari 2001 hingga 30 September 2018. Sebanyak 14 Projek Perumahan Rakyat (PPR) telah dilulusakan untuk Negeri Sarawak. 8 projek (4,140 unit rumah) PPR telah siap dibina manakala 3 projek (832 unit) dalam peringkat pembinaan dan 3 projek (1,161 unit) masih dalam pelbagai peringkat perancangan. Di Miri, 1 projek (505 unit) telah siap dibina iaitu PPR Lambir.
2. Pada masa ini belum ada perancangan baharu bagi pembangunan PPR di Miri. Kementerian Perumahan dan Kerajaan Tempatan (KPKT) sangat mengalu-alukan syor dan cadangan tapak PPR yang bersesuaian daripada pihak Kerajaan Negeri. Tapak yang dicadangkan oleh pihak Kerajaan Negeri ini, akan dinilai berdasarkan garis panduan Unit Perancang Ekonomi, Jabatan Perdana Menteri (EPU, JPM). Tapak milik Kerajaan Negeri akan diberikan keutamaan untuk KPKT melaksanakan PPR secara tender terbuka mengikut dasar yang telah ditetapkan oleh Kerajaan. Namun begitu, pembangunan PPR adalah, tertakluk kepada peruntukan kewangan yang disediakan oleh Kerajaan Persekutuan dengan memberikan keutamaan kepada lokasi-lokasi yang mempunyai bilangan setinggan serta permohonan rumah yang tinggi oleh golongan B40.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN AHMAD AMZAD BIN  
MOHAMED@HASHIM  
[KUALA TERENGGANU]**  
**TARIKH : 28 NOVEMBER 2018 (RABU)**

**SOALAN NO.**

**Y.B. TUAN AHMAD AMZAD BIN MOHAMED@HASHIM [ KUALA TERENGGANU ]** minta **MENTERI KEWANGAN** menyatakan persiapan awal yang diambil oleh Kerajaan untuk mendepani unjuran kemungkinan berlaku krisis kewangan global.

**JAWAPAN**

Tuan Yang di-Pertua,

1. Prospek ekonomi Malaysia kekal menggalakkan walaupun dalam persekitaran luar yang semakin mencabar berikutan konflik perdagangan, volatiliti dalam pasaran kewangan dan harga minyak global serta ketegangan geopolitik. Dalam tempoh sembilan bulan pertama 2018, Keluaran Dalam Negeri Kasar (KDNK) berkembang 4.7 peratus dipacu oleh perbelanjaan swasta serta prestasi perdagangan luar yang baik selaras dengan aktiviti perdagangan global. Dari sudut penawaran, sektor perkhidmatan dan pembuatan terus menerajui pertumbuhan. Jangkaan ini adalah selari dengan unjuran pertumbuhan ekonomi negara oleh Tabung Kewangan Antarabangsa (IMF) dan Bank Dunia di antara 4.7 peratus hingga 4.9 peratus bagi 2018 dan 2019.
2. Sebagai sebuah ekonomi kecil dan terbuka, Malaysia terdedah kepada cabaran luaran berikutan perang perdagangan di antara China dan Amerika Syarikat, ketidaktentuan harga komoditi dan pasaran kewangan antarabangsa serta konflik geopolitik. Walau bagaimanapun, sistem kewangan yang lebih berdaya tahan dan maju berserta paras rizab antarabangsa yang kekal tinggi memperkuatkannya keupayaan ekonomi negara untuk menghadapi kejutan luar serta memastikan bahawa pengantaraan kewangan terus berfungsi tanpa gangguan. Di samping itu, struktur perdagangan yang pelbagai dari segi destinasi dan produk serta kadar pertukaran yang fleksibel dijangka memainkan peranan penting sebagai penyerap kejutan luaran tanpa menjelaskan aktiviti ekonomi domestik.
3. Tambahan pula, bagi menghadapi sebarang ketidaktentuan ekonomi global, Kerajaan sentiasa mengambil langkah proaktif untuk memastikan kecairan yang mencukupi, pasaran berdaya tahan dan mengurangkan aktiviti spekulasi dalam pasaran. Langkah-langkah ini termasuk:

- a. menghalang penglibatan institusi kewangan berlesen dalam negara dalam aktiviti kontrak hadapan tanpa serahan (*non-deliverable forward*, NDF);
  - b. membenarkan pemastautin mengekalkan 25% daripada perolehan eksport dalam akaun mata wang asing; dan
  - c. liberalisasi tambahan untuk meningkatkan mudah tunai pasaran bon dan menambah fleksibiliti terhadap aktiviti lindung nilai (*hedging*) kepada pelabur dan peniaga tempatan untuk mengurus risiko dedahan terhadap kadar pertukaran di dalam negara.
4. Kerajaan juga akan sentiasa mengambil langkah untuk meningkatkan daya tahan ekonomi dengan mempelbagaikan sumber ekonomi, memperkuuh daya saing ekonomi dan kedudukan fiskal negara. Antara langkah utama yang telah dibentangkan semasa Belanjawan 2019 termasuk:
- a. memperkuuh pengurusan fiskal Kerajaan;
  - b. meningkatkan hasil Kerajaan melalui leverage aset Kerajaan dan menyemak semula dasar percukaian;
  - c. merangsang pelaburan dalam industri berteknologi tinggi;
  - d. mempermudah lagi urusan perniagaan di Malaysia khususnya melalui penambahbaikan proses perdagangan dan pentadbiran cukai;
  - e. memperkuuh perusahaan kecil dan sederhana (PKS);
  - f. mempergiat industri pelancongan; dan
  - g. menggalakkan usahawan terlibat dalam ekonomi digital.
5. Melangkah ke hadapan, pelbagai inisiatif akan terus dilaksanakan oleh Kerajaan bagi memperkuuh pembaharuan struktur untuk mendepani sebarang ketidaktentuan ekonomi global. Inisiatif ini termasuk menangani ketidaksepadanan dalam pasaran buruh; menambah baik kualiti pendidikan dan latihan; mempelbagaikan lagi produk dan pasaran eksport; mempergiat inovasi dan penggunaan teknologi; serta meningkatkan potensi ekonomi digital demi memacu pertumbuhan masa hadapan.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHAN FOONG HIN**  
**[ KOTA KINABALU ]**

**TARIKH : 28 NOVEMBER 2018 (RABU)**

**SOALAN :**

minta **MENTERI INDUSTRI UTAMA** menyatakan rancangan Kementerian dalam melaksanakan Malaysia Sustainable Palm Oil (MSPO) sepenuhnya menjelang tahun depan.

**JAWAPAN**

Tuan Yang di-Pertua,

Untuk makluman Ahli Yang Berhormat, skim pensijilan Minyak Sawit Mampan Malaysia (MSPO) akan menjadi mandatori menjelang tahun 2019. Segala usaha sedang diambil oleh Kerajaan untuk memastikan semua rantai bekalan industri sawit negara termasuk juga pekebun kecil dipersijilkan sepenuhnya. Mulai tahun 2020, semua minyak sawit yang dieksport adalah minyak sawit yang dipersijilkan MSPO.

Kementerian juga sedang bekerjasama dengan semua pemegang taruh yang terlibat termasuk agensi-agensi Kerajaan dan organisasi bukan kerajaan (NGO) untuk memastikan usaha ini tercapai. Kerajaan amat serius dan komited untuk mencapai hasrat tersebut seperti yang telah dinyatakan oleh YAB Perdana Menteri semasa ucapan beliau dalam Perhimpunan Agung Pertubuhan Bangsa-Bangsa Bersatu (PBB) pada 29 September 2018.

Sehingga kini, kira-kira 1.2 juta hektar tanaman sawit telah mendapat persijilan MSPO.

**PEMBERITAHUAN PERTANYAAN LISAN DEWAN RAKYAT,  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI WAN HASSAN BIN MOHD  
RAMLI  
[ DUNGUN ]**

**TARIKH : 28 NOVEMBER 2018 (RABU)**

**SOALAN NO. 36**

Minta **MENTERI HAL EHWAL EKONOMI** menyatakan kriteria pemilihan dan pelantikan Dato` Khor Chin Poey sebagai Pengurus Felda Technoplant Sdn. Bhd. untuk memperkasakan dan memacu pertumbuhan dan pengembangan FTPSB di masa hadapan.

**JAWAPAN**

Yang di-Pertua,

Untuk makluman Ahli Yang Berhormat, FELDA Technoplant Sdn. Bhd. (FTP) merupakan agen pelaksana pengurusan ladang FELDA seluas 230,000 hektar dan ketika ini menguruskan program tanam semula sekitar 8,000 hektar setahun sejak ia ditubuhkan pada tahun 2005. Bagi tujuan memperkasa dan memacu pertumbuhan serta pengembangan FTP di masa hadapan, Lembaga FELDA terlebih dahulu perlu memikirkan kaedah yang sesuai bagi membaik pulih tadbir urus di dalam FTP berikutan banyak aduan diterima daripada peneroka. Tadbir urus ini meliputi proses transformasi FTP bagi memastikan semua kakitangan dapat bekerja dengan lebih tersusun dan efektif. Sekiranya ini dapat dilaksanakan, hasil kebun peneroka mampu ditingkatkan dan dalam masa yang sama kos operasi dapat dikurangkan. Ini juga selaras dengan pelan strategik FELDA yang baharu iaitu salah satunya untuk menjadikan FELDA sebagai pengurus perladangan negara yang terulung.

Antara kriteria yang diambil kira oleh Lembaga FELDA bagi pemilihan Pengerusi FTP seperti berikut:

1. Mempunyai pengalaman yang luas dalam sektor swasta pengurusan perladangan terutama sekali di dalam program melibatkan pembukaan atau penanaman semula kelapa sawit;
2. Terlibat dan memahami tujuan penubuhan dan pembukaan tanah FELDA bagi memastikan gerak kerja dan halatuju FTP adalah selaras dengan tujuan asal penubuhan FELDA;
3. Bukan daripada kalangan Pengurusan FELDA/FTP untuk memastikan idea – idea baru dapat diketengahkan dan pengakhirannya membawa kepada kelainan dengan perubahan positif ke atas pengurusan; dan

4. Dilantik daripada kalangan Ahli Lembaga Pengarah FELDA untuk memastikan setiap keputusan dasar FELDA berkenaan operasi ladang mendapat input yang tepat terlebih dahulu dengan situasi sebenar di FTP.

Setelah mengambil kira faktor-faktor tersebut dan meneliti antara Ahli Lembaga Pengarah FELDA, Datuk Khor Chin Poey merupakan calon yang terbaik untuk dilantik sebagai Pengerusi FTP. Rekod khidmat beliau sebagai Ketua Operasi Kejuruteraan FELDA, pengalaman dan kepakaran beliau di dalam mengendalikan syarikat kelapa sawit swasta dan memenuhi kriteria di atas adalah asas kepada pemilihan sebagai Pengerusi FTP.

Sekian, terima kasih.

28 November 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**

**DARIPADA : Datuk Seri M. Saravanan [Tapah]**

**TARIKH : 28 November 2018**

**SOALAN NO.37**

**Datuk Seri M. Saravanan [Tapah] minta MENTERI PERTANIAN DAN INDUSTRI ASAS TANI menyatakan objektif dan sasaran Majlis Penasihat Pertanian Negara dalam jangka masa 5 tahun akan datang dan adakah Kementerian turut melibatkan golongan sasaran seperti petani, peladang, penternak dan juga nelayan dalam majlis tersebut.**

**JAWAPAN**

**Tuan Yang Dipertua,**

Majlis Penasihat Pertanian Negara (MPPN) merupakan majlis khusus yang berperanan sebagai badan penasihat mewakili pelbagai pihak berkepentingan untuk berbincang serta membantu mengenal pasti dan mencadangkan hala tuju sektor pertanian termasuk hal-hal berkaitan sekuriti makanan supaya seiring dengan keperluan semasa.

Selain berperanan untuk memberi saranan dalam mempertingkatkan keselamatan bekalan makanan serta mengurangkan kebergantungan import, MPPN juga akan mengemukakan syor-syor kepada YB Menteri Pertanian dan Industri Asas Tani mengenai strategi-strategi yang efektif dalam memberi nilai tambah kepada hasil pertanian, meningkatkan potensi eksport sekali gus meningkatkan pendapatan golongan petani dalam sektor berkaitan.

Objektif MPPN yang telah dipersetujui oleh Jemaah Menteri adalah seperti berikut:

- (i) mengenal pasti dasar, pendekatan dan strategi baharu bagi meningkatkan sekuriti makanan;
- (ii) mengenal pasti pembangunan pertanian negara secara mapan melalui penggunaan sumber secara optima dan berkonsepkan *circular economy*;
- (iii) mencadangkan hala tuju kegiatan penyelidikan dan pembangunan (R&D) pertanian secara pengkomersialan hasil serta inovasi penyelidikan;
- (iv) mencadangkan inisiatif dan program bagi meremajakan sektor pertanian (*rejuvenate*);
- (v) mengenal pasti intervensi Kerajaan bagi mencapai objektif yang disasarkan seperti penggunaan teknologi terkini, pembiayaan kredit dan aktiviti pertanian yang mempunyai nilai tambah yang

- tinggi bagi menjadikan sektor pertanian sebagai penyumbang utama pertumbuhan ekonomi;
- (vi) mengenal pasti langkah dan pendekatan bagi meningkatkan daya saing dan eksport hasil pertanian negara;
  - (vii) mengenal pasti isu dan masalah serta cadangan penyelesaian dalam usaha menarik pelaburan swasta bagi mengkomersialkan pengeluaran pertanian dan pembangunan industri asas tani; dan
  - (viii) mengenal pasti keberkesanan pelaksanaan Dasar Agromakanan Negara (DAN) 2011-2020 dan mencadangkan hala tuju serta input bagi pembangunan DAN 2.0 (2021-2030).

MPPN turut melaksanakan beberapa sesi libat urus (*engagement*) dengan agensi di bawah Kementerian, bersama wakil-wakil industri termasuk golongan sasar bagi mengenalpasti isu-isu dan cadangan-cadangan yang boleh digunakan untuk merangka hala tuju Kementerian dan seterusnya dapatan boleh digunakan dalam merangka Dasar Agromakanan Negara (DAN) 2.0 yang akan dilaksanakan mulai tahun 2021 hingga 2030.

Sehubungan itu, penubuhan MPPN sebagai badan bebas dan berkecuali diharap dapat memberikan panduan berguna kepada Kementerian Pertanian dan Industri Asas Tani untuk merangka tindak balas dasar yang berkesan dalam menangani isu-isu kritikal yang seringkali dihadapi oleh sektor pertanian.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**

**DARIPADA : Tuan Robert Lawson Chuat  
[Betong]**

**SOALAN NO.38**

Tuan Robert Lawson Chuat minta **MENTERI PERTANIAN DAN INDUSTRI ASAS TANI** menyatakan apakah usaha dan perancangan Kerajaan bagi memastikan Sarawak dapat mencapai sasaran SSL 50% (Self Sufficiency level) bagi daging lembu dan tenusu menjelang tahun 2030.

**JAWAPAN**

Tuan Yang Dipertua,

Untuk makluman Ahli Yang Berhormat bagi Betong, pihak Jabatan Perkhidmatan Veterinar, Sarawak telah mengadakan beberapa siri Bengkel pada bulan April 2018 hingga Jun 2018 untuk merangka Pelan Induk Pembangunan Ternakan Negeri Sarawak untuk tahun 2018 – 2030.

Daripada bengkel tersebut beberapa strategi serta pelan tindakan telah dikenalpasti untuk mencapai sasaran 50% SSL untuk daging lembu dan tenusu menjelang tahun 2030.

Strategi utama ialah untuk meningkatkan pengeluaran ternakan lembu pedaging dan lembu tenusu dengan penglibatan secara besar-besaran oleh syarikat swasta.

Untuk pengeluaran lembu pedaging secara besar-besaran sebuah syarikat milik SALCRA (*Sarawak Land Custody and Rehabilitation Agency*) telah dikenalpasti sebagai ‘*anchor farm*’ untuk menjadi ladang pembiakbaka untuk mengeluarkan 1,000 ekor baka lembu pedaging setiap tahun. Beberapa syarikat perladangan kelapa sawit juga dikenalpasti untuk menternak lembu pedaging di ladang kelapa sawit secara integrasi secara besar-besaran.

Setakat ini 40 estet kelapa sawit telah terlibat dengan penternakan lembu pedaging secara integrasi dan kerajaan mengalakkan lebih banyak lagi estet lain untuk terlibat. Sebagai galakan kerajaan akan memberi baka lembu secara pawah kepada estet, di mana estet akan bayar balik kepada kerajaan jumlah anak lembu yang sama dalam tempoh 6 tahun. Anak lembu yang dibayar balik ini akan diagihkan kepada peserta lain kemudian supaya jumlah penternak yang terlibat akan bertambah. Di Sarawak terdapat lebih kurang 1,500,000 hektar ladang kelapa sawit. Dianggarkan 600,000 hektar (40%) adalah sesuai untuk penternakan lembu secara integrasi di mana 150,000 ekor lembu boleh diternak (1 ekor/ 4 Ha.).

Sebuah Syarikat iaitu PPES Ternak Sdn Bhd syarikat milik Perbadanan Pembangunan Ekonomi Sarawak (PPES) telah dikenalpasti untuk melaksanakan penternakan lembu pedaging secara fidlot secara besar-besaran dengan pengeluaran 6,000 ekor lembu pedaging setahun.

Kerajaan juga akan mengalakkan pengusaha individu untuk menternak lembu pedaging secara separa-intensif atau fidlot di mana kerajaan akan memberi bantuan dalam bentuk geran.

Kerajaan juga akan mempergiatkan penternakan kerbau pedaging di Bahagian Miri dan Limbang di mana terdapat kawasan yang sesuai serta penternak yang berpengalaman dalam menternak kerbau pedaging (Kerbau Sawah). Ini akan menyumbang kepada pengeluaran daging.

## **NO SOALAN : 38**

Untuk lembu tenusu, sebuah syarikat swasta (Eco Solution Sdn Bhd) di Serian, Sarawak telah dikenalpasti untuk pengeluaran susu lembu segar secara besar-besaran dan menggunakan teknologi yang moden. Sebuah reban tertutup lengkap dengan *tunnel cooling system* telah dibina di mana 120 ekor Lembu tenusu baka Holstein telah diternak. Ladang ini akan menjadi *anchor farm* dengan sasaran dapat menternak 1,000 ekor lembu untuk mengeluarkan 7 juta liter susu setahun. Penternak berskala kecil dan sederhana juga akan dibangunkan di kawasan berdekatan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI DR. AHMAD ZAHID  
BIN HAMIDI**  
**[BAGAN DATOK]**  
**TARIKH : 28 NOVEMBER 2018 (RABU)**

**SOALAN NO.**

**Y.B. DATO' SERI DR. AHMAD ZAHID BIN HAMIDI [ BAGAN DATOK ]**  
minta **MENTERI KEWANGAN** menyatakan langkah-langkah yang telah  
diambil bagi menstabilkan semula nilai ringgit yang kian menyusut  
sehingga RM4.15 berbanding sebelum PRU-14 pada paras RM3.95.

**JAWAPAN**

Tuan Yang di-Pertua,

1. Sehingga 21 November 2018, nilai ringgit telah menyusut sebanyak 3.5% manakala nilai mata wang serantau yang lain telah menyusut sebanyak 1% hingga 7.2% berbanding dolar AS. Walau bagaimanapun, berbanding dengan mata wang serantau, prestasi ringgit adalah lebih stabil. Ringgit telah menambah nilai sebanyak 1.6% berbanding peso Filipina dan 4.2% berbanding rupiah Indonesia bagi tempoh yang sama.
  
2. Faktor utama kejatuhan nilai ringgit serta mata wang serantau kebelakangan ini adalah akibat aliran keluar dana asing yang didorong oleh faktor-faktor luaran, antaranya:
  - a. ketidakstabilan pasaran dunia akibat risiko perang perdagangan (*trade war*) antara Amerika Syarikat – China;
  - b. kenaikan kadar faedah oleh bank pusat Amerika Syarikat menyebabkan pelabur menilai dan mengimbangi semula kedudukan portfolio mereka dalam pasaran kewangan “ekonomi sedang pesat membangun” (*emerging economies*); dan
  - c. kebimbangan mengenai risiko kesan penularan (*contagion effect*) dalam kalangan mata wang ekonomi sedang pesat membangun berikutan kejatuhan ketara peso Argentina dan lira Turki, yang telah menyusut nilai sebanyak 48.7% dan 28.4% masing-masing berbanding dengan dolar AS sehingga 21 November 2018.

Tuan Yang di-Pertua,

3. Dalam keadaan pasaran kewangan global yang tidak menentu ini, kadar pertukaran ringgit yang fleksibel telah memainkan peranan yang penting sebagai penyerap kejutan luaran tanpa menjelaskan aktiviti ekonomi domestik. Namun begitu, volatiliti ringgit yang ketara boleh menjelaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Oleh itu, Kerajaan akan sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah-langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.
4. Antara langkah-langkah tersebut adalah penetapan syarat supaya sebahagian besar hasil eksport dalam mata wang asing ditukar kepada ringgit. Langkah ini bertujuan menambahkan mudah tunai wang asing dalam pasaran dalam negeri dan peningkatan penguatkuasaan ke atas peraturan tukaran asing sedia ada bagi mencegah mata wang ringgit diniagakan di luar pesisir bagi mengekang aktiviti spekulasi.
5. Liberalisasi prosesif peraturan pentadbiran tukaran asing juga menghasilkan lebih banyak rizab yang tidak berpusat. Perkara ini dicerminkan dalam peningkatan pemerolehan aset di luar negara oleh bank dan korporat pemastautin. Secara khususnya, bank dan korporat pemastautin memegang tiga perempat daripada aset luar negeri Malaysia yang boleh digunakan untuk memenuhi obligasi hutang luar negeri tanpa membuat sebarang tuntutan ke atas rizab antarabangsa BNM.

Tuan Yang di-Pertua,

6. Kesan kejatuhan nilai mata wang ringgit terhadap inflasi keseluruhan pada sembilan bulan pertama 2018 juga kekal rendah, memandangkan harga bahan api yang diimport telah ditetapkan sejak akhir Mac 2018. Di samping itu, barang import lain hanya mencakupi sebahagian kecil daripada penggunaan dalam negeri. Sebagai contoh, bahan mentah dan bahan pengantara yang diimport hanya mencakupi sekitar 20% daripada jumlah pengeluaran produk dalam Indeks Harga Pengguna Malaysia (IHP). Tidak termasuk bahan api, import barang siap pula mencakupi 7% daripada bakul IHP. Untuk makluman Ahli Yang Berhormat, kadar inflasi bagi tempoh Mei 2018 hingga Oktober 2018 adalah seperti berikut:

<b>Bulan</b>	<b>Kadar Inflasi (%)</b>
Mei 2018	1.8
Jun 2018	0.8
Julai 2018	0.9
Ogos 2018	0.2
September 2018	0.3
Oktober 2018	0.6

7. Dalam jangka masa panjang, nilai ringgit akan didorong terutamanya oleh kekuatan asas ekonomi negara. Sehubungan itu, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkuuh daya saing ekonomi dan kedudukan fiskal negara. Paras rizab antarabangsa BNM pula dijangka akan disokong dengan pemulihan kestabilan pasaran dunia, penambahbaikan sentimen pelabur dan lebihan akaun semasa negara yang kekal positif. Dengan ini, prestasi ringgit, rizab negara dan pasaran modal akan terus meningkat seiring dengan pengukuhan asas ekonomi negara dan pasaran kewangan global.

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB DATUK ABD RAHIM BIN BAKRI**

**KAWASAN : KUDAT**

**TARIKH : 28 NOVEMBER 2018, RABU**

**SOALAN :**

**YB DATUK ABD RAHIM BIN BAKRI** minta **MENTERI KERJA RAYA** menyatakan apakah Kementerian bercadang untuk menurap semula jalan raya Pitas ke Paitan memandangkan keadaan jalan tersebut pada masa ini sebahagiannya telah rosak dan beralun yang mana ianya telah menyebabkan berlakunya beberapa siri kemalangan jalan raya malah ada di antaranya melibatkan kehilangan nyawa.

**JAWAPAN :**

Tuan Yang Di-Pertua,

Untuk makluman Ahli Yang Berhormat, Jalan Pitas ke Paitan adalah berstatus jalan Negeri, iaitu di bawah bidang kuasa Kerajaan Negeri Sabah.

Sekian, terima kasih.

**NO. SOALAN 41**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATO' SRI HAJAH NANCY SHUKRI  
[ BATANG SADONG ]**

**TARIKH : 28 NOVEMBER 2018**

**SOALAN : 41**

**DATO' SRI HAJAH NANCY SHUKRI** minta **PERDANA MENTERI** menyatakan sejauh manakan keberkesanan peranan SUHAKAM dalam menangani hak asasi manusia, khususnya dari sudut memastikan setiap kanak-kanak wajib ke sekolah termasuk kanak-kanak istimewa.

**JAWAPAN : YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA**  
**MENTERI (UNDANG-UNDANG)**

Tuan Yang di-Pertua,

Untuk makluman Ahli Yang Berhormat, bagi memastikan setiap kanak-kanak mempunyai hak terhadap pendidikan, SUHAKAM telah menjalankan satu kajian khusus berkaitan dengan hak kepada pendidikan bagi kanak kanak yang bermasalah pendidikan. Kajian SUHAKAM tersebut merangkumi siri forum mengenai hak kepada pendidikan bagi kanak kanak yang bermasalah pendidikan; bengkel hak asasi manusia kepada guru-guru pendidikan khas; kajian semula undang-undang dan dasar sedia ada yang berkaitan dengan pendidikan bagi kanak kanak yang bermasalah pendidikan; dan lawatan ke sekolah yang mempunyai program integrasi serta sekolah yang dikendalikan oleh NGO.

Hasil dapatan dari kajian khusus berkenaan, Kerajaan telah bersetuju untuk menyediakan tempoh percubaan selama 3 bulan kepada kanak-kanak ini bagi mengenalpasti kesesuaian program sama ada ianya diletakkan di bawah program pendidikan khas, program pendidikan khas integrasi ataupun program pendidikan insklusif di samping komitmen bagi memperkasakan kelas pendidikan khas integrasi di sekolah-sekolah Kerajaan.

Selaras dengan usaha meningkatkan kemudahan prasarana mesra kanak-kanak bermasalah pendidikan ini satu kerjasama antara Kerajaan dengan pihak swasta telah dimulakan di Kuala Lumpur selain akan turut mengadakan program kesedaran dan advokasi kepada masyarakat di

peringkat negeri dan juga melalui siaran media. Selain daripada perkara yang dinyatakan di atas, SUHAKAM juga boleh menyiasat sekiranya terdapat sebarang aduan berkaitan kanak-kanak yang dinafikan hak terhadap pendidikan.

Sekian, terima kasih.

**PEMBERITAHUAN PERTANYAAN MESYUARAT KEDUA,**  
**PENGGAL PERTAMA, PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : DATUK SERI PANGLIMA MADIUS TANGAU  
(TUARAN)**

**TARIKH : 28 NOV 2018 (RABU)**

**SOALAN**

Minta **MENTERI PERTAHANAN** menyatakan adakah Kementerian sedar bahawa keselamatan di pantai Timur Sabah adalah kritikal. Oleh itu adakah Kementerian bercadang untuk memindahkan Pangkalan Tentera Lokawi dan Pangkalan Tentera Laut di Sepanggar ke pantai timur Sabah.

**JAWAPAN**

Tuan Yang di-Pertua,

Kementerian Pertahanan sentiasa sedar dan peka akan masalah keselamatan di kawasan Pantai Timur Sabah. Mengenai cadangan untuk memindahkan Kem Tentera di Lok Kawi dan Pangkalan TLDM di Sepanggar ke Pantai Timur Sabah, Kementerian Pertahanan pada masa ini tiada sebarang perancangan untuk memindahkan kedua-dua kem tersebut.

Hal ini kerana, Angkatan Tentera Malaysia (ATM) telahpun meningkatkan penempatan dan kehadiran trup serta aset tambahan di Pantai Timur Sabah semenjak 26 Disember 2014 yang melibatkan ketiga-tiga cabang Perkhidmatan, iaitu Tentera Darat Malaysia (TD), Tentera Laut Diraja Malaysia (TLDM) dan juga Tentera Udara Diraja Malaysia (TUDM). Atur gerak operasi juga telah, sedang dan akan dilaksanakan oleh setiap Perkhidmatan di Kawasan Tanggungjawab (KTJ) secara berterusan (24 jam) bagi memastikan tahap keselamatan dan keamanan terpelihara sepanjang masa.

Kekuatan keseluruhan trup serta aset ATM bagi penugasan yang ditetapkan merangkumi beberapa buah batalion infantri, kenderaan perisai, helikopter, radar dan kelengkapan pengawasan serta kapal-kapal TLDM dan juga jet-jet pejuang TUDM. Di samping itu, formasi-formasi TD, TLDM, TUDM dan juga Angkatan Bersama (AB) terlibat sepenuhnya di dalam tugas gerakan di KTJ pantai dan daratan kawasan Pantai Timur Sabah.

TLDM semenjak tahun 2015 telah mewujudkan Pangkalan Laut (*Sea Basing*) yang berfungsi sebagai Pangkalan Operasi Hadapan (POH) di perairan timur Sabah, melaksanakan penempatan tim detasmen dan pesawat udara TLDM, penubuhan Markas Pemerintahan Armada Timur (pada tahun 2017) di Sepanggar, pemindahan kapal Skuadron Ronda (pada tahun 2018), pemindahan Markas Wilayah 2 (pada tahun 2018) di Sandakan serta

memperkasakan peranan KD SRI TAWAU dan KD SRI SEMPORNA (pada tahun 2017) .

TLDM juga telah melaksanakan operasi rondaan bersama tentera laut Negara jiran yang dikenali sebagai *Trilateral Maritime Patrol* (TMP) di Laut Sulu. Ini direalisasikan melalui *Trilateral Cooperative Arrangement* (TCA) melibatkan Malaysia, Filipina dan Indonesia bermula pada tahun 2016. Pengawasan maritim yang dilaksanakan turut disokong oleh kapal ronda serta bot pemintas daripada Agensi Penguatkuasaan Maritim Malaysia dan Polis Marin di bawah kelolaan ESSCOM.

Disamping itu, keselamatan di Pantai Timur Sabah turut diperkuuhkan oleh TD dengan penubuhan Briged Ke-13 Infantri (ESSCOM) di Zon Selamat Timur Sabah (ESSZONE) dan dua buah pasukan infantri di bawah naungan Briged Ke-31 Infantri yang kini berada di Sarawak akan diaturgerak secara berfasa ke Sabah sebagai memenuhi keperluan strategik keselamatan sempadan daratan.

Selari dengan penambahan kekuatan ini, Kementerian Pertahanan juga merancang untuk menambah aset kavalri (kenderaan berperisai) dan mewujudkan pasukan udara Tentera Darat. Keupayaan pengesan (*detection*) juga akan dipertingkatkan dengan penubuhan pasukan ISRT (*Intelligence, Surveillance, Reconnaissance and Targeting*) dan perolehan aset UAV (*Unmanned Aerial Vehicle*) bertujuan untuk meningkatkan tahap kesiagaan tentera di negeri Sabah.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TAN SRI NOH BIN HAJI OMAR  
[TANJONG KARANG]**

**TARIKH : 28 NOVEMBER 2018 [ RABU ]**

**SOALAN NO. 43**

Minta **MENTERI PERUMAHAN DAN KERAJAAN TEMPATAN** menyatakan apakah dasar baru yang akan diperkenalkan dalam **menurunkan harga rumah terutamanya harga Rumah Mampu Milik.**

**JAWAPAN**

Tuan Yang di-Pertua,

1. Untuk makluman Yang Berhormat, **Dasar Perumahan Negara (2018-2025)** akan menjadi dasar utama yang akan dirujuk sebagai memandu arah serta memacu sektor perumahan negara secara keseluruhan dengan menekankan perancangan, pembangunan dan pengurusan perumahan yang sistematik dan cekap bagi menjana habitat yang mampan, berdaya huni, berkualiti dan inklusif serta mampu dimiliki oleh rakyat.
2. Manakala, Dasar Perumahan Mampu Milik Negara (DRMM) merupakan sub dasar bagi menggariskan standard, spesifikasi utama serta panduan bagi pembangunan rumah mampu milik di bawah kategori perumahan awam dan sosial yang dibangunkan oleh Kerajaan Persekutuan, Kerajaan Negeri atau pihak swasta untuk mengatasi isu yang dibangkitkan berkaitan dengan perumahan mampu milik awam dan sosial.
3. Untuk makluman Yang Berhormat juga, dalam ucapan **Belanjawan 2019**, Kerajaan telah mengumumkan beberapa langkah dalam membantu mengurangkan harga rumah baharu termasuklah Rumah Mampu Milik (RMM) antaranya :-
  - a) Pengecualian duti setem sehingga RM300,000 yang pertama ke atas surat cara pindah milik dan perjanjian pinjaman bagi tempoh dua tahun sehingga Disember 2020 bagi pembeli rumah pertama bernilai sehingga RM500,000;
  - b) Pengecualian Cukai Jualan dan Perkhidmatan (SST) ke atas perkhidmatan pembinaan dan bahan binaan dan sebagai balasan, Persatuan Pemaju Hartanah dan Perumahan Malaysia (REHDA) telah bersetuju untuk mengurangkan sebanyak 10%

harga rumah yang tidak tertakluk kepada kawalan harga untuk projek baharu; dan

- c) Pengecualian duti setem ke atas surat cara pindah milik bagi pembelian rumah pertama, berharga antara RM300,001 hingga RM1 juta berkuat kuasa bagi tempoh 6 bulan mulai 1 Januari 2019 yang akan menjadi sebahagian daripada Kempen Pemilikan Rumah Kebangsaan, di mana pemaju akan menawarkan diskaun 10% ke atas harga harta tanah kediaman projek sedia ada.
4. Untuk makluman yang Berhormat, Kementerian Perumahan dan Kerajaan Tempatan (KPKT) telah mengambil langkah yang serius bagi mengurangkan harga rumah dalam pasaran antaranya ialah:
- a) Bekerjasama dengan Kementerian Kerja Raya bagi kaedah pembinaan melalui penggunaan Sistem Bangunan Industri (IBS) yang ditambah baik agar kos pembinaan dapat dikurangkan tanpa menjaskan standard kualiti perumahan;
  - b) Penetapan kategori harga rumah berdasarkan pendapatan mengikut kawasan iaitu bandar dan luar bandar serta jenis rumah; dan
  - c) Pelaksanaan penyediaan 1 juta rumah mampu milik dalam tempoh 10 tahun seperti dalam Manifesto Pakatan Harapan.
5. Manakala, langkah-langkah sedia ada bagi mengekang kenaikan harga rumah terus dilaksanakan antaranya:
- a) Memperkemas Cukai Keuntungan Harta Tanah (CKHT) ke atas keuntungan daripada pelupusan harta tanah dan saham dalam syarikat harta tanah dalam tahun ke-6 dan tahun seterusnya, seperti berikut:

- i) Menaikkan kadar CKHT dinaikkan daripada 5% kepada 10% bagi syarikat, individu bukan warganegara dan bukan pemastautin tetap.
  - ii) Menaikkan kadar CKHT daripada 0% kepada 5% bagi individu warganegara dan penduduk tetap. Walau bagaimanapun, CKHT dikecualikan atas harga harta tanah, rumah kos rendah, rumah kos sederhana rendah dan rumah mampu milik di bawah RM200,000.00.
- b) Menaikkan harga jualan minimum rumah yang boleh dibeli oleh warga asing kepada RM 1 Juta seunit;
  - c) Mensyaratkan pemaju untuk mempamerkan ketelusan harga jualan harta tanah secara terperinci termasuk semua manfaat / insentif yang bakal diberikan kepada pembeli;
  - d) Melarang pemaju melaksanakan kaedah pemasaran berdasarkan *Developer Interest Bearing Scheme* (DIBS) yang dikhuatiri boleh mengelirukan dan memanipulasi pembeli rumah;
  - e) Mewajibkan semua pemaju untuk melaporkan pembelian pukal yang melebihi 4 unit harta tanah dalam satu pemajuan oleh mana-mana individu maupun syarikat; dan
  - f) Mengeluarkan panduan mengenai *Loan to Value* (LTV) bagi pembelian rumah ketiga dan seterusnya, di mana pembeli hanya akan memperoleh pinjaman maksimum 70% sahaja. Baki selebihnya perlu ditanggung sendiri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WIRA HAJAH MAS ERMIEYATI  
BINTI SAMSUDIN  
[ MASJID TANAH ]**

**TARIKH : 28 NOVEMBER 2018 [ RABU ]**

**SOALAN NO. 44**

Minta **MENTERI PERUMAHAN DAN KERAJAAN TEMPATAN** menyatakan jumlah bilangan rumah mampu milik mengikut negeri yang telah disiapkan pada tahun 2018.

**JAWAPAN**

Tuan Yang di-Pertua,

1. Untuk makluman Yang Berhormat, berdasarkan maklumat yang dikumpul oleh Kementerian Perumahan dan Kerajaan Tempatan (KPKT) sehingga 31 Mac 2018 sebanyak 146,038 unit Rumah Mampu Milik (RMM) telah disiapkan. Statistik mengikut negeri adalah seperti berikut:-

<b>BIL</b>	<b>NEGERI</b>	<b>JUMLAH SIAP (UNIT)</b>
1.	JOHOR	23,875
2.	KEDAH	11,882
3.	KELANTAN	7,953
4.	K.LUMPUR	9,561
5.	LABUAN	352
6.	MELAKA	10,593
7.	N.SEMBILAN	3,494
8.	PAHANG	10,006
9.	PERAK	9,449
10.	PERLIS	1,097
11.	P. PINANG	6,300
12.	PUTRAJAYA	3506
13.	SABAH	22205
14.	SARAWAK	5839
15.	SELANGOR	7,302
16.	TERENGGANU	12,624
<b>JUMLAH</b>		<b>146,038</b>

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB USTAZ HAJI HASANUDDIN**  
**BIN MOHD YUNUS [ HULU LANGAT ]**  
**TARIKH : 28 NOVEMBER 2018 (RABU)**

**SOALAN NO. 45**

Minta **MENTERI KESIHATAN** menyatakan status terkini gerak kerja untuk menjadikan Parlimen sebagai zon larangan merokok.

**JAWAPAN**

**Yang di-Pertua,**

Kementerian Kesihatan Malaysia komited untuk memastikan semua tempat-tempat awam adalah seratus peratus bebas daripada sebarang bentuk amalan merokok demi menjaga kesihatan golongan bukan perokok daripada bahaya asap rokok serta produk merokok yang lain. Ini adalah selaras dengan pematuhan Artikel 8, WHO *Framework Convention on Tobacco Control* (FCTC). Malaysia telah menjadi negara parti kepada WHO FCTC sejak tahun 2005. Bagi mencapai sasaran 'Negara Bebas Asap Rokok' menjelang tahun 2045 iaitu jumlah peratus perokok di Malaysia adalah kurang daripada 5%, Kementerian Kesihatan Malaysia komited untuk memperluaskan tempat-tempat larangan merokok dengan memastikan semua tempat-tempat awam adalah bebas daripada sebarang bentuk aktiviti merokok.

Antara komitmen utama bagi pelaksanaan ini adalah dengan menjadikan Parlimen sebagai 100% zon larangan merokok. Kawasan Parlimen adalah merupakan kawasan larangan merokok di bawah Peraturan 11(1)(h) Peraturan-Peraturan Kawalan Hasil Tembakau (PPKHT) 2004. Walau bagaimanapun, terdapat tiga (3) bilik merokok di bangunan Parlimen yang telah mendapat kelulusan Kementerian Kesihatan pada tahun 2008 dan 2009 iaitu kafetaria blok utama, tempat rehat (*lounge*) Ahli Parlimen Dewan Rakyat dan ruang telaga udara. KKM berpendirian bahawa kawasan Parlimen yang merupakan simbol kepada kedaulatan negara Malaysia mestilah bebas daripada sebarang bentuk amalan merokok demi menjaga kesihatan dan mengelakkan bahaya ancaman asap rokok kepada kakitangan dan pelawat bangunan Parlimen.

Oleh itu, bagi memastikan pelaksanaan Parlimen sebagai 100% bebas daripada sebarang bentuk amalan merokok, kelulusan tiga bilik merokok yang terdapat di bangunan Parlimen sebelum ini telah dibatalkan. Untuk memastikan pematuhan kepada peraturan larangan merokok semasa di dalam kawasan Parlimen, pemakluman kepada beberapa saluran telah dibuat termasuk makluman kepada Pejabat Pentadbir Parlimen, Speaker

## **NO SOALAN: 45**

Dewan Rakyat dan Speaker Dewan Negara. Kementerian Kesihatan telah memohon pemakluman bagi pematuhan peraturan ini kepada semua Ahli Parlimen dan orang awam melalui ketiga-tiga pejabat ini.

Kementerian Kesihatan juga telah memohon agar pihak Pentadbir Parlimen memperkuuhkan pemakluman berkaitan pematuhan peraturan ini dengan memasangkan papan tanda yang lebih jelas di pintu masuk dan mengedarkan notis arahan pematuhan semasa pelaporan di buat di pintu masuk. Kementerian Kesihatan Malaysia juga telah memulakan aktiviti penguatkuasaan secara berterusan di seluruh Kawasan Parlimen.

Selain itu, Kementerian Kesihatan juga menjalankan program saringan dan rujukan ke perkhidmatan berhenti merokok mQuit bagi membantu mereka yang merokok untuk berhenti merokok. Perkhidmatan ini akan dilaksanakan bagi membantu anggota dan kakitangan Parlimen yang merokok serta lain-lain petugas di Parlimen. Program saringan tahap kesihatan perokok dijalankan setiap hari dan seramai 200 telah dibuat saringan tahap racun karbon monoksida dan keupayaan paru-paru berfungsi. Bagi anggota dan kakitangan yang bertugas di Parlimen program rawatan khusus termasuk Program intervensi tingkahlaku telah diadakan pada 9 November 2018 oleh Jabatan Kesihatan Wilayah Persekutuan Kuala Lumpur.

**Yang di-Pertua,**

Kementerian Kesihatan akan memantau setiap pelaksanaan ini bagi memastikan pelaksanaan berjalan dengan lancar dan misi untuk menjadikan kawasan Parlimen bebas sepenuhnya daripada segala bentuk amalan merokok akan tercapai.